

Ог МАНДИНО

ДУНЁНИНГ  
ЭНГ БУЮК  
САВДОГАРИ



ТОШКЕНТ  
«DAVR PRESS» НМУ  
2015

«МАЖБУРИЙ ВЕРПУЛ НУСХА»

www.davr.uz

821.111(73) Ишиш агадиёти

М/24

Ог Мандинонинг миллионлаб нусхада чоп этилган китоблари уни инсоният тараққиёти муаммоларини ечишга ҳаракат қилган буюк ёзувчи сифатида дунёга танидди. Унинг асарларини бутун дунёда — Америка корпорацияси маъмурларидан тортиб, япон фабрикаларининг оддий ишчиларигача, Мексика қамоқхоналарида ётган маҳбуслардан тортиб, оддий немис уй бекаларигача, қўйингки, миллати, ирки, ижтимоий келиб чиқишидан қатъи назар, ҳар бир инсон севиб мутолаа қиласди.

“Дунёнинг энг буюк савдогари” асарида муаллиф оддий савдо қилиш қонун-коидаларини ҳаётий, фалсафий фикрлар билан уйғулаштирган.

Китоб кенг ўқувчилар оммасига мўлжалланган.

### Рус тилидан Рустам Жабборов таржимаси.

Барча ҳуқуқлар амалдаги қонуналарга асосан ҳимояланган.

“DAVR PRESS” нашриёт-матбаа уйининг ёзма рухсатисиз ушбу нашрни қисман ёки тўлиқ ҳолда бошқа оммавий ахборот воситаларида электрон ёки механик кўринишда кўчириб босиш, магнит ташувчи воситаларда тарқатиш қатъий тақиқланади.


ISBN 978-9943-984-21-9

Alisher Navoiy  
nomidagi  
O'zbekiston MK

2015/102  
A6405

N1 32054  
291

© «DAVR PRESS» НМУ, 2015



## МУҚАДДИМА

Салом... Мен — Ог Мандино. Олис болалик хотириларимнинг аксарияти кечадигидек яққол кўз ўнгимда: ҳар доим уларни ёдга олганимда энг аввал жиккаккина малласоч аёл — онамнинг сиймоси кўз ўнгимда гавдаланади. Унинг ўз ўғли ҳақидаги орзулари ўта антиқа эди: “Қачондир, сен ёзувчи, жуда ҳам машхур ёзувчи бўласан”, деган гапни кўп қайтарарди.

Мана, унинг орзуси амалга ошди. Кўпгина болалар ота-оналарининг ўз келажаклари ҳақидаги режаларини хафа бўлиб эслашади. Аммо, менга онамнинг орзуси жуда ёқарди. Машхур ёзувчи! Мен мактабда илк баҳоимни олиб келгунимга қадар, ойим кутубхонадан турли хил китобларни олиб келарди. Мен дастлаб ўзим тўқиган митти ҳикоячаларни ҳам илк бор ойимга кўрсатганман. Юқори синфга ўтганимда сўнг синф деворий газетасининг муҳарририга айландим. Албатта, у пайтларда жуда баландпарвоз режалар тузардим — Миссиури университетига ўқишга кирмоқчи эдим, чунки мамлакатдаги энг яхши журналистлар ўша ерда тайёрланишига ишонардим. Аммо, кутилмаганд... мактабни битиришимга олти ҳафта қолганида, онам вафот этди. Ажал унга ошхонада, одатдагидек мен учун таом пишираётганида чанг солди. Мен айрилиқ азоби билан олишарканман, жуда мудҳиш дамларни бошдан кечирдим. 1940 йилда ўзим ўйлагандек, ўқишга эмас, қофоз комбинатига ишга жўнадим. 1942 йилда ҳарбий

ҳаво корпусига хизматта олиндим. 1943 йилда, менга, ҳарбий авиация аскариға зобитлик рутбасини беришди ва “кумуш қанот” билан тақдирлашди. Мен ўттис мартта Германияни Б-24 “Liberator” билан бомбардимон қилганман. Уруш тугагач, Америкага қайтдим ва бомбардимончи авиациянинг сабиқ зобити учун иш топиш осон эмаслигини билиб олдим.

Бир неча ой ишсизлик нафақаси билан амал-тақал кун кечиргач, сугурта агенти бўлиб ишлашга қарор қилдим. Урушга боришдан аввал севган қизимга албатта уйланаман, деб сўз бергандим. Энди ваъдамни бажаришим керак эди. Ўн йил хотиним, қизим ва мен Яратганинг марҳамати остида бирга кун кечирдик. Мен оиласми боқиши учун кечаю кундуз тиним билмай ишлардим. Бироқ, кун сайин қарз ботқоғига ботиб боравердим. Кунларнинг бирида одатий қўнғироқлар, таклифлар ва эътирозлардан чарчаб, уйга қайтарканман, хумордан чиққунча ичгим келди. Чамамда мен бунга ҳақли эдим. Шу тахлит, уйга ҳар куни ичиб келадиган одат чиқардим. Бу аҳвол ҳар куни тақрорланавергач, хотиним ва қизим мени ташлаб кетишиди.

Икки йил азоб-уқубатлар ичида ўтди. Шалоқ машинамда иш қидириб, мамлакатни дарбадар кезишига тушдим. Бир шиша арzon шароб учун ҳар қандай ишни бажариб кетаверадиган бўлдим. Кечалари дуч келган ҳаробаларда тунаб қолар ва ўзимнинг ночор қисматимга аччиқ-аччиқ кўз ёш тўкардим. Кливленднинг одатий қаҳратон тонгларидан бири умрбод хотирамда муҳрланиб қолиши баробарида, ҳаётимни бутунлай ўзгартириб юборди. Ломбард идораси ёнидан ўтиб борарканман, унинг чанг босган деразасидан кичикроқ тўппончани кўриб қолдим. Унга нархи кўрсатилган сарғиши қофоз

ёпиштириб қўйилганди — 29 \$. Чўнтағимни ковлаштириб роппа-роса учта ўнталикни топиб олдим. Бу менинг бор бойлигим эди ва ўша онда ягона тўхтамга келдим: “Ҳаммасига нуқта қўядиган вақт келди. Тўппончани сотиб оламан-да, хароба кулбамга бориб, уни ўқлайман, кейин пешанамга тираб тепкини босаман... шу билан ҳар куни кўзгуда дуч келадиганим — баҳтиқаро дайдининг турқини қайтиб кўрмайман”.

Ҳозир ўша пайтдаги руҳий ҳолатимни сўз биланifo-далаб беролмайман. Ҳозир ўша ҳолатни эслаб, кулгим келади. Наҳот шу даражада иродасиз бўлган бўлсам, дея ҳайратга ҳам тушаман.

Табиийки, тўппончани сотиб олмадим. Бир оз сандирақлаб, яна ўша ломбард биноси олдига етиб борганимда атрофни оппоқ қор қоплаганди. Бу пайтда ломбард ёпилган, мен эса, яна изгий-изгий жамоат кутубхонаси олдига келиб қолгандим. Назаримда унинг ичи анча иссиқ эди. Мен кутубхонага кириб, минглаб китоблар орасида кезарканман, ҳаётда ўз йўлинни топмоқчи бўлганлар учун зарур маслаҳат бера оладиган адабиётни излардим. Мен бир қанча ана шундай китобни танлаб олдим-да, столга мук тушиб мутолаага шўнғидим. Мен қаерда адашдим? Наҳотки, мен олий маълумотли бўла туриб, тўғри йўлни топа олмасам? Нимагадир умид қилсан бўладими? Ичкиликбозлик асоратидан қутула оламанми? Мен ҳаётда ҳаммасини йўқотиб бўлдимми? Наҳотки, мен бу дунёга фақат азоб тортиш, кўз ёш тўкиш учунгина келган бўлсам?

Мен ўзимни топиш учун мамлакат бўйлаб узок вақт бемақсад кездим. Кливленд кутубхонаси ана шу йўлдаги биринчи бекат эди. Яна аллақанча кутубхона ва ўкув хоналарида бўлдим. Мукаммалликка эришиш,

алкоголдан қутулиш йўлларини кўрсатувчи кўплаб китобларни ўқиб чиқдим. Нью-Хемпшир шаҳрининг Конкорд шаҳар кутубхонасида ўзим учун замонавий оламнинг мумтоз адабини кашф этдим. Бу В. Клемент Стоун эди. Унинг “Ишонч — муваффақият гарови” номли китоби менинг ҳаётимни буткул ўзгартириб юборди. Стоуннинг омад фалсафаси менга шу қадар таъсир қилди, ажойиб кунларнинг бирида вужудимга ғойибдан жуда катта куч-гайрат ёғилиб келаётганини ҳис этдим. Назаримда мен ҳар қандай мақсадга эриша олардим. Шундан сўнг мен ҳамма ғамларимни енгиш учун берилиб меҳнат қилишим лозимлигини пайқадим. Жаноб Стоун “Combined Insurance Company of America” (Бирлашган миллий суғурта агентлиги) президенти экан.

Узоқ изланишлардан сўнг ушбу фирманинг Бостондаги филиалига суғурта агенти бўлиб ишга жойлашдим. Бу орада мен ўзимга нисбатан қудратли куч ва умид уйғонишида катта ҳисса қўшган, мени жонидан ортиқ сева оладиган аёлни учратдим. Компания мен сингари 32 ёшли омадсиз кимсани ишга олган чоғда биз оила қурдик. У билан биргаликда ўтказган 40 йиллик умрим ҳаётимнинг энг яхши онларига айланди.

Бир йил ичida мен ушбу компаниянинг Шимолий Мэн округидаги менежери вазифасига тайинландим. Мен тасодифий ёлланма меҳнатга ўрганган кишиларни ишга олиб, уларга Стоун фалсафасини ўргатиб кўрдим. Натижা кутилганидек бўлди ва биз компания миқёсида рекорд натижаларга эришдик. Фойдаланилмаган дам олиш кунларим ҳисобига тежаб қолинган бир хафталик маблағга ёзув машинкасини сотиб олиб, ижодга қўл урдим. Энди болаликдаги ёзувчи бўлиш орзусини амалга ошириш фурсати етиб келганди. Менинг биринчи

асарим қишлоқ жойларида сүгурта хизматини ташкил этиш борасида тавсиялардан иборат эдим. Мен бу кўлёzmани компьютерда китобчага ўxшатиб, чоп этдимда, компаниянинг Чикаго офисига жўнатиб, меҳнатларим эътирофини интиқлик билан кута бошладим.

Мўъжиза юз берди! Шу тариқа мен, Бетти ва кичкинтоимиз биргалиқда бор ашқол-дашқолимизни машинамизнинг томига юклаб, Чикагога йўл олдик. Мени дарҳол савдо бўлимига ишга олишди. Ҳисоботларнинг бари менинг қўлимдан ўтарди. Кейин эса... Мен ниҳоят ёзувчи бўлиб кетдим.

Жаноб Стоун ўша пайтларда “Чексиз омад” деб номланган оз нусхали нашрни таъсис этди. Бу нашр барча ходимлар ва ҳиссадорларга тарқатилар эди. Мен офисда бир неча ой ишлаб, жаноб Стоуннинг яқин дўстига айландим.

Худди шу пайтга келиб, ушбу нашрнинг муҳаррири ишдан бўшаб кетди. Албатта, бу борада менда тажрибанинг ўзи йўқ эди. Аммо, жаноб Стоун бу вазифани менинг зиммамга юклиди. Мен эса бу тармоқ нашрини умуммиллий журнал даражасига олиб чиқдим. Ўн йил ичида ижодий жамоамиз аъзолари сони икки кишидан олтмиш икки кишига етди. Шу тариқа журнализим адади чорак миллиондан ошди.

Кунларнинг бирида журналнинг навбатдаги сонини ёпиш учун биттагина мақола етмай қолди. Газета-журналлар тахламини титкилаб ҳам тайнинли материал топа олмадим. Шундан сўнг уйга келдим-у, даҳшатли автоҳалокатга учраб, ногирон бўлиб қолган Бен Хоган исмли кимсанинг кечинмаларини қофозга туширдим.

Бу мард инсон кейинчалик наинки оёққа туриб кетди, балки мамлакат очиқ чемпионатининг ғолибига ҳам

айланганди. Мақола “Чексиз омад” журналида босилди. Бу гал ҳам омад менга кулиб боқди. Мана, столим устида Нью-Йорк нашриётидан келган мактуб ётарди. Нашриёт муҳаррири Хоганнинг кечмишлари ҳақидаги мақола жуда ёққани, агар истасам нашриёт билан ҳамкорлик қилишими мумкинлиги ёзилганди.

Орадан 18 ой ўтиб, ушбу нашриётда менинг “Дунёнинг энг буюк савдогари” деб номланган шапалоқдеккина китобчам дунё юзини кўрди. Албатта ўша пайтда Ог Мандино деган муаллифни ҳеч ким танимас, шу боис китоб адади ҳам ўзига яраша эди. Беш мингта!

Яна менга омад кулиб боққанди. Магнат Де Вос, “Amway Corporation” раҳбарларидан бири компания мажлисларидан бирида нутқ сўзларкан, Ог Мандино деган кулгили бир исм соҳиби ёзган “Дунёнинг энг буюк савдогари” деган асарни ўқиганини қистириб ўтди ва ҳаммага бу китобни ўқишни тавсия қилди. Де Воснинг бу тавсияси сабабли ушбу китобга бўлган талаб ҳаддан ортиб кетди. Икки йил ичида 350 минг нусха китоб сотилиб кетди. “Bantam Books” нашриёти китобнинг нашр этиш хуқукини сотиб олди. Йил сайин бу китобга бўлган талаб ортса ортдики, асло камаймади. Гарчи бу китоб чоп этилганидан буён ўттиз йилдан ортиқ вақт ўтган бўлса-да, бу китоб кўлма-кўл ўқилмоқда. Қайта-қайта турли тилларда нашр қилинмоқда. Ўша пайтдан бошлаб то ҳозиргача ҳар ҳафта ўқувчиларимдан ўртacha 18–20 та хат оламан. Улар асосан битта саволни сўрашади? “Бу китоб сизнинг ҳаётингизни ҳам ўзгартирдими?” Бундай одамлар орасида оддий ўқувчилардан ташқари машҳур тадбиркорлар, шоу-бизнес вакиллари, машҳур спортчилар ҳам кўп эди.

Албатта, мен бу хатларнинг ҳар бирига ёзма жавоб қайтараман ва уларнинг шахсий характери мени кўпроқ қизиқтиради. Шу боис, мен бу одамларнинг исмларини айтиб ўтирмайман. Дарҳақиқат, мен баҳтли одамман. Севимли онажоним бу дунёни тарк этганидан бери орадан ярим асрдан кўпроқ вақт ўтди. Агар онамнинг руҳи ҳозир чиндан ҳам самоларда парвоз қилиб юрган бўлса, у мени кўриб, эшитиб юрган бўлса, мёндан фахрланармикин? Ҳар қалай шунга умид қиласман!

Энди эса... марҳамат, “Дунёнинг энг буюк савдогари”ни ўқинг!

1990





## САХОВАТДАН САХОВАТТАЧА

Хафид бир муддат бириңж (бронза)дан ишланган күзгү қаршисида түхтаб, ўзининг сайқалланган маъдан сатҳидаги аксига кўз ташлади:

— Ортда қолган ёшликтинги излари фақат кўзлардагйна сақланиб қолади, — дея пичирлади у шинам мармарли хона тарафга одимларкан. У ҳолсиз оёқларини аранг судраб босаркан, ақик тошидан тарашланиб ишланган, олтин ва кумушдан сайқалланган шифтни кўтариб турган устунлар орасидан ўтиб, сарв ёғочи ва фил суюгидан ясалган қадимий хонтахта қаршисида түхтади. Ойнадек силлиқланган тошбақа косаларининг хира ёғдуси ҳар ёқда — деворларда, турли суратлар, нақшланган қимматбаҳо ёпинчиқлар ташланган диван ва каравотларда кўзга ташланиб туради.

Улкан бириңж тувакларда бир неча авлодни кўрган, юз йилларни қаритган баҳайбат пальмалар ўртадаги антиқа фаввора дилни яйратади. Фаввора атрофида, саватларда гуллар ва қимматбаҳо тошлар тутиб турганча бир-бири билан ҳусн талашаётган нимфаларнинг ҳайкаллари ўрнатилилган эди. Хафиднинг бу қасрига кириш шарафига мұяссар бўлган ҳар бир инсон қаср хожасининг афсонавий бойлигига шубҳа қилиши мумкин эмасди.

Мўйсафид хожа қаср ҳовлисидаги гулзор оралаб, кичкина йўлакдан юриб борди ва омборхонага тушди. Бу улкан омбор тахминан шу қасрнинг ҳажмига тенг бўлиб, узунлиги беш минг қадамдан кўпроқ чиқарди. Хафиднинг бош ҳисобчиси Эрасмус хожасининг ташрифи ва янги амрларини итоаткорона илтифот ила кутиб туради.

— Хайрли кун, хожам!

Хафид жимгина бош иргаб, одимлашда давом этди. Эрасмус хожасига эргашди. Ҳисобчи хожасининг айнан шу ерда кутиб туришни буюрганини англолмай турарди. Хафид пастки майдончага етганида, яқинда келтирилган молларни қандай жойлаштирилиши ва уларнинг нархини билиш учун тўхтади.

Моллар орасида жун, зифир матолари, пергамент, Кичик Осиёдан келтирилган мушк-анбар, ойна, малҳам, Хафиднинг ватанидан олиб келинган ёнғоқ ва анжир қоқиси, Тадморнинг ранг-баранг матолари ва доридармонлари, занжабил, долчин, Арабистоннинг лаължавоҳирлари, Мисрдан келган базалът ва ганч, Римда ишланган суратлар, Юнонистон ҳайкаллари қалашиб ётарди. Чолнинг сезгири димоғига олма, олхўри, пишлок ва занжабил аралашмасидан тайёрланган малҳамнинг ҳавода сузуб юрган ёқимли ифори кирди.

Ниҳоят у Эрасмусга юзланди:

– Қадрдон дўстим, ғазнамиздаги ҳамма бойликларнинг қиймати қанча?

Эрасмуснинг ранги оқарди.

– Ҳамма бойликларни дедингизми, хожам?

– Ҳа, ҳаммаси.

– Охирги ҳисоб-китоблар аниқ эсимда қолмаган, аммо тахминан айтишим мумкин. Адашмасам, етти миллион олтин динордан ошганди.

– Агар биз ҳамма молларимизни тиллага чақадиган бўлсак, қанча бўлиши мумкин?

– Ҳали ҳисоб-китоб ишларимиз тугамади, хожам. Аммо бу моллардан қолган фойданинг ўзи камида уч миллион динор бўлади.

Хафид қониқиши маъносида бош иргади.

– Энди мол сотиб олишни тўхтат. Менга тегишли ҳамма молларни қисқа фурсатда тилла ём биларга айлантириш чорасини кўр.

Кутылмаганда ҳисобчининг оғзи ланг очилиб қолди. У шу қадар ҳайратта тушган эдики, бир муддат ҳатто тили калимага келмай турди, ниҳоят ҳүшини сал тўплаб олгач, аранг тилга кирди:

– Тушунмадим, хожам. Бу йил биз учун анча баракали келди. Барча дўкондорларингиз моллар олдинги йилга нисбатан кўпроқ сотилганини айтишди. Ҳатто Рим легиони ҳам бизнинг буюртмачимизга айланди. Шундай экан, сиз икки ҳафта бурун Қуддус ҳукмдорига вაъда қилинган икки мингта араб тулпорини етказиб беришдан воз кечмоқчимисиз? Мени маъзур тутинг, аммо камина амрингиздан не муддаони кўзлаганингизни англолмай турибман.

Хафид кулимсираб, эски қадрдонининг қўлини сиқиб кўйди.

– Азиз биродарим, мендан илк бор топшириқ олган кунинг эсингдами? Бунга кўп йиллар бўлди. Ўшанда эндиғина қўлимга ишга келгандинг.

Эрасмуснинг юзи бир зум тиришиб, кейин ёришгандек бўлди.

– Хожам, ўшанда “йиллик фойдамизнинг teng ярмини гарибларга тарқатиб чиқ” дегандингиз.

– Сен эса мени савдо ишида нўноқликда айблаб, айтганимни қилмагандинг, – муғамбirona луқма ташлади Хафид.

– Мен бирор нохушлик юз беришидан хавфсирагандим, хожам.

Хафид тоғдек уюлиб ётган молларга ишора қилди:

– Энди ўша хавотиринг бехуда эканини тан оласанми?

– Ҳа, хожам.

– Ҳозир ҳам мен ўз режаларимни сенга тўла ошкор этмасимданоқ, амримни бажаришга киришавер. Мен қариб қолдим, эҳтиёжларим ҳам шунга яраша. Маҳбубам гўзал Лиша мени ташлаб кетганидан бери анча йиллар ўтди. Шундан бери мен фақат ўз бойлигимни

шахримизнинг фақирларига тарқатиш ҳақида ўйлаяпман. Тинчгина умргузаронлик қилишим учун ўзимда энг зарур нарсаларни олиб қоламан. Сен мол-мулк рўйхати билан бирга барча дўконларимни ўз эгаларига ҳадя қилиш бўйича тегишли хужжатларни тайёрла. Шунингдек, барча бошқарувчиларига шунча йиллик садоқатли хизматлари учун 5 минг талант олтинниadolat билан тақсимлаб беришингни сўрайман. Улар бу пулларни ўз эҳтиёжлари учун хоҳлаганларидек ишлатишлари мумкин.

Эрасмус нимагадир эътиroz билдиromoқчи бўлиб оғиз жуфтлаганида, Хафид уни қўл ишораси билан тўхтатди.

– Менинг кўрсатмаларим сенга манзур эмас шекилли?

Ҳисобчи мажҳул қиёфада бош чайқаб, жилмайишга уринди.

– Йўқ, хожам, фақат сизни бундай қарор қабул қилишингизга нима сабаб бўлганини билолмаяпман, холос. Сиз худди ҳаётдан умиди батамом сўнган кимсалардек гапирмоқдасиз.

– Худди сендеқ йўл тутяпман, азизим Эрасмус. Сен ҳар доим менга ўзингдан-да кўпроқ ғамхўрлик кўрсатиб келдинг. Сен шу пайтга қадар ўз келажагинг ҳақида ўйлаб кўрдингми? Борди-ю, бизнинг тижоратимиз касадга учраса нима қиласдинг?

– Биз узоқ йиллардан бери дўстмиз, – шошилиб жавоб берди Эрасмус. – шундай экан, мен қандай қилиб фақат ўзим ҳакимда, ўзимнинг хузур-ҳаловатим тўғрисида ўйлашим мумкин эди?

Хафид дўстини маҳкам бағрига босаркан деди:

– Сўзларинг самимиyllигига заррача шубҳам йўқ. Сенга эллик минг талант олтинни ўз номингга ўтказишингни айтдим. Энди то менга аввалдан топширилган ишни ниҳоясига етказгунимга қадар, ёнимда қолишингни сўрайман. Бундан ташқари бу қаср ва омборни ҳам сенга қолдириб кетаман. Шундан сўнг мен хотиржам маҳбубам Лиша хузурига боришим мумкин.

Кекса ҳисобчи ўз хожаси ва устозига синчковлик билан тикилди. Айни чоғда у эшиштган ҳамма гапларини идрок эта оладиган ҳолатда эмасди.

– Эллик минг олтин талант? Қаср... омбор... Йўқ, хожам, мен бундай олий марҳаматга лойиқ эмасман!

Хафид бу гал ҳам қатъият билан бош ирғади:

– Мен сени ҳамиша энг яқин дўстим деб билганман, Эрасмус. Сен олий марҳамат деб ўйлаган нарсалар аслида сенинг беҳад садоқатинг ва фидойилигинг олдида ҳеч нарсага арзимайди. Сен бошқалар баҳти учун яшаш санъатини пухта эгаллагансан ва бу хислат ҳаммасидан ўта юқори баҳоланади. Энди сен менинг ҳамма режаларимни амалга ошишини тезлата олишингга ишонаман. Ҳозир мен учун ўтаётган вақтнинг ҳар зарраси бебаҳо.

Бу сўзлар ҳисобчининг қулоғига худди дафн мусиқасидек чалинди. Эрасмус юзларини юваётган аччиқ кўз ёшларини тўхтата олмай, дўстига термилди:

– Ваъдангиз нима бўлади? – сўради у. – Улар ўз кутида қоладими? Биз ҳар доим худди aka-уқадек бўлиб келсак-да, бу ҳақда оғиз очмагансиз.

Хафид қўлларини кўкраги устида қовуштириб, сирли кулимсиради:

– Биз ҳали бу ҳақда гаплашамиз. Сен ҳозирги топшириқларимни бажариб бўлганингдан кейин, сенга шу пайтга қадар ҳаммадан яшириб келган сирни очаман, – Хафид бир оз сукутга чўмиб, сўнг давом этди. – Бу ҳақда фақатгина севимли аёлим Лишага, унинг ўлими олдидан айтгандим, холос. У ҳам бу сирни ўзи билан олиб кетди.



Н  
БОБ

## САНДИҚЧАДАГИ СИР

Орадан күнлар ўтиб, төг-төг олтин юкланған карвон ишончли соқчилар қуршовида Дамашқдан йўлга чиқди. Кекса карвонбошининг сафар халтасида зарур хужжатлар қатори найча шаклида ўралган нома ҳам бор эди. Унда хожанинг барча олтинларни хожага тегишли дўконлар ўртасида тарқатиш ҳақида сўз борарди. Карвон Хафидга тегишли барча дўконлар олдида тўхтаб ўтарди. Ҳар бир савдогар ўз хожасининг бу антиқа қарорини катта ҳайрат ва сукут билан қарши оларди

Антират шаҳридаги дўконга етганда, хожанинг топшириги тўла-тўкис якунига етказилди. Карвонда битта ҳам кўйма олтин қолмаган, бари тарқатиб бўлинганди.

Ўша пайтларда ҳали Ер юзида бирор-бир тожир дунёning энг буюк савдогари — Хафид эришган дараҗадаги кудратли савдо салтанатини яратса олмаганди. Эрасмус юраги қон-зардобга тўлганча, ўз хожасининг амрини ижро этмоқда. Омборлар бўшаб, Хафид салтанатининг тамғаси дўконларни безамай қўйди. Хожа юборган чопар Эрасмусга хожаси уни фаввора ёнида кутаётганини айтди.

Хафид кекса дўстининг юзига боқиб сўради:

- Ҳамма топширигимни бажардингми?
- Ҳа, хожам!
- Унда, кўнглингни хотиржам қил-да, орқамдан юр.

Улар юриб боришаркан, қадам товушлари қаср де-ворларига урилиб, акс садо берарди. Хафид сирли йўлак сари олиб борадиган мармар зинапоялар сари бошлади. Зиналардан кўтарилиб, яширин эшиқдан ўтишди ва илгарилашди. Улар норанж ёғочидан ясалган баланд

таглик устига ўрнатилган гулдон олдида тўхташганда, уларнинг қаршисида бекиёс даражада гўзал манзара юз очди. Ойнадан оқаётган қуёш нурлари оқ, пушти ва бошқа турфа рангларда товланарди. Ҳар икки дўстнинг серажин юзларига табассум ёйилди. Икковлон бир зум пастда туришгач, кейин қаср гумбазининг ички қисмига жойлашган хона тарафга кўтарилишди. Зинапоя олдида кечаю кундуз навбатчилик қилиб турадиган посбонларнинг бугун йўқлиги Эрасмуснинг диққатини тортди.

Улар ниҳоят айланма зиналардан кўтарилиб, кенг майдончага чиқишидни ва нафас ростлаш учун тўхташи. Хафидбелбоғига илинган кичикроқ калит билан оғир эман эшикни очди. Эшик секин ғижирлаб очилди. Эрасмус эшик олдида иккиланиб турганини кўрган хожаси унга киравер дегандек имо қилгач, остона ҳатлади. Бу ҳужрага қарийб ўттиз йилки, хожасидан бўлак ҳеч ким қадам босмаган эди. Шу боис, Эрасмус хона ўртасида қаққайиб туриб қолди. Хонада йиллар давомида йиғилиб қолган чанг туфайли тепадаги туйнуклардан зўрга инаётган ёруғлик ҳаммаёқни кулранг тусга киритганди. Эрасмус қўрқиб кетганиданми, то кўзлари қоронғиликка кўнишиб улгургунча, жим қолди. Хафид эса, дўстининг хонани айланиб чиқишини кузатиб турди. Кейин шошилмасдан олдинга ўтди-да, деворга тақалиб турган баланд таглик устидаги, заранг ёғочидан ишланган мўъжаз сандиқчага кўлини қўйди.

— Эрасмус, нега ҳафсаланг пир бўляпти? — сўради Хафид дўстига юзланаркан.

— Очиғи, нима дейишга ҳам ҳайронман, хожам!

— Хонанинг ўта одми жиҳозлангани сени ажаблантирмаяптими? Дарвоқе, манавини, — у сандиқчани кўрсатди, — жиҳоз деб аташ ҳам кулгили туюлади. Бу кичик ҳужрани шунча йил кўз қорачигидек асраб келиш сенга мантиқсиз бўлиб туюляпти, тўғрими?

Эрасмус бош иргади.

— Сиз ҳақсиз, хожам. Мен гумбаз ичидаги бу яширин хужрангиз ҳақида жуда кўп узунқулоқ гаплар эшигандим.

— Биламан. Айрим гап-сўзлар ўзимнинг ҳам қулоғимга чалинган. Бу ерда олмос тоғи ёхуд ёввойи қушлар сақланишини ҳам айтишган. Эронлик бир гиламфуруш савдогар бу ерда кичик бир ҳарам сақлашим ҳақида писандада қилган. Бу ҳақда эшигтан Лиша роса кулганди. Одамларнинг тасаввур имкониятлари ҳайратланарли даражада кенг. Мени сал бўлмаса, фирт хотинбозга чиқаришган. Дўстим, сени ишонтириб айтаманки, бу ерда кўча-кўйда, дўконларда қулоқقا чалинган нарсаларнинг ҳеч бирини кўрмайсан. Манави мўъжаз сандиқчани айтмасак, албатта.

Дўстлар сандиқнинг икки тарафида жойлашиб олишгач, Хафид унинг белига ўралган тасмаларни ечишга тушди. Сандиқчанинг қопқоғи сапчиб очилган пайтда уларнинг димоғига заранг ҳиди урилди. Кўтарилган қуюқ чанг Эрасмусга сандиқ ичидаги нарсаларни аниқтиниқ кўриш имконини бермади. У ўзини сал орқага олиб, кўзларини қисганча олдинга назар солди. Кейин у нигоҳини ўз хожасига қаратди ва паришонлик билан кўлларини ёйди. Сандиқ ичидаги на олмос, на бошқа хазинадан ном-нишон кўринар, унда фақат бир неча чарм ўрамларидан бўлак ҳеч нарса йўқ эди... Хафид оҳиста қўл узатиб ўрамлардан бирини олди. Кейин ўша ўроғлиқ тери парчасини кўксига босиб, кўзларини юмди. Хафиднинг юзида сокинлик ва хотиржамлик акс этди, ажинлар йўқолиб, ўтган йилларнинг аянчли излари йўқолиб кетгандек бўлди.

— Бу ҳужра кўплаб инсонларнинг бойликка, қиммат баҳо тошлар ва олмосларга интилишлари билан тўлган. Аммо, бу ерда бойлиқдан асар ҳам йўқ, бўлиши ҳам мумкин эмас. Зоро дунёнинг барча олтинлари сенинг

2015/102  
A6405

nomidagi 17

O'zbekiston MK

«MAJBURIY BEPUL NUSXA»

қаршингда турган бу хазинага тенг келолмайди. Бу ўрамларда менинг бутун бисотим — омад, баҳт, муҳаббат, гўзаллик ва умрбоқийлик жамланган. Нимага эришган бўлсам, мен ана шу ўрамлардаги номалар сабаб эришдим. Мен бу номалар ва уларни менга ишониб топширган донишманд олдида қарздорман.

Хафиднинг овозида янграган нотаниш оҳанглар Эрасмусни хийла чўчитиб қўйганди:

— Сиз менга қандай сирни очмоқчисиз, хожам? Нахотки, мана шу сандиқ сизга шунча давлат ва қудратни баҳш этган бўлса?

— Ҳар икки саволингга бирдек жавоб бераман: ҳа!

Эрасмус пешанасидаги тер томчиларини қўли билан атаркан, Хафидга шубҳали тикилди:

— Ҳар қандай хазинадан қимматроқ тўрадиган бу номаларда нималар битилган ўзи?

— Биттасидан ташқари қолган ҳамма номаларда қонун-қоидалар деймизми, тартиблар, муқаррар ҳақиқатлар деймизми, хуллас нима деб номланишидан қатъи назар, ўта гўзал, ҳамма тушунадиган тилдаги сирли ҳикматлар битилган. Савдо санъатидан пухта хабардор бўлишни истаган ҳар бир инсон бу ҳикматларни англаши, қулогига қуйиб олиши ва ундан унумли фойдаланиши лозим. Бу номалардаги талабларни мукаммал равишда бажаргандарнинг ҳар бири маълум даражадаги бойликка эриша олади.

Эрасмус эски битикларга тикилганча ҳайратдан қотиб турарди.

— Айтмоқчисизки, мен ҳам бу номаларнинг сирини билиб олсан, сиздек бой-бадавлат бўла олман, тўғрими?

— Истасанг бундан кўпроғига эришасан.

— Сиз биттасидан бошқа ҳамма номаларда тижорат қоидалари битилган дедингиз. Охирги нома нима ҳақида?

— Сен охирги деб атаганинг, — тушунтира бошлиди Хафид, — аслида энг биринчисидир. Шундан сўнг но-

маларни фақат тартиб бўйича ўқиши керак. Тартиб асло бузилмаслиги лозим. Биринчи номада ўта камдан-кам одамларгагина маълум бўлган сир ҳақида сўз боради. Нафсилашнинг айтганда, қолганларини яхшилаб тушуниш учун биринчи номани пухта англаб олиш лозим бўлади.

— Сизни тўғри тушунган бўлсан, ҳар бир инсон буюк савдогар бўлишга қодир.

— Ҳа, бу аслини олганда унчалик қийин иш эмас. Бироқ сен бунинг учун ўз вақтинг, кучинг ва имкониятларингни аямаслигинг керак бўлади. Эсингда тут — фақат бу ҳикматларнинг ҳар бири сенинг вужудингга, борлифингга, қон-қонингга сингиб кетмоғи керак. Шундагина улкан бойлик соҳибига айланасан.

Эрасмус қўл узатиб, сандиқдаги ўрамлардан бирини қўлини олди. Уни бармоқлари орасида оҳиста тутиб тураркан, Ҳафидга юзланди:

— Матзур тутинг, хожам, нега сиз ўзингизнинг таж-рибангизда синалган усулларда эмас, айнан ушбу та-мойилларга таяниб иш тутишни мақбул кўрдингиз? Мен сизни тушунмаяпман. Сиз ҳамиша ўз олийжаноблигингиз ва саховатингиз билан ҳаммага ўрнак бўлиб келдингиз. Нега сиз бу ҳикматларни шу чоққача бойлигингизга катта ҳисса қўшган дўкондорларингизга раво кўрмадингиз? Улар ҳам бойиб кетиши мумкин эди-ку? Эҳтимол улар бу қоидалардан хабардор бўлишганида, сизга янада каттароқ фойда келтирган бўлар эдилар. Нега сиз шунча билим ва кўникмани бошқалардан сир тутиб келдингиз?

— Менинг бошқа иложим йўқ эди. Кўп йиллар аввал менга бу номаларни ишониб топширишган чоғда, мен бу қадимий сирни ҳеч кимга очмасликка онт ичгандим. Ўша пайтда мен бу ғаройиб илтимос ортида яширинган асл сабабни билмасдим. Бу ҳикматларга амал қилиш учун фақат менгагина изн берилган эди. Фақат, бу ҳикматларни излаб юрган ва уларни билишга менданда муносиброқ бир одам топилмагунча, уларни сир


тутишим керак эди. Бу номалар менга топширилганида, мен жуда ёш эдим. Менга ушбу номаларни олиш учун келадиган одамнинг ўзига хос сирли белгилари бўлади деб айтишган. Эҳтимол, ўша нотаниш одамнинг ўзи ҳам бундан бехабар бўлар? Лекин мен уни дарров таниб оламан ва бу омонатни унинг қўлларига топшираман. Мен уни сабр-тоқат билан кутдим, – давом этди Хафид. – Шу вақт мобайнида ҳаётим ушбу ҳикматларга қаттиқ боғланиб қолди. Мен ушбу номалардаги сирлардан шахсий мақсадлари учун фойдаланишга рухсат этилган саноқли одамлардан бири эдим. Мен ушбу ҳикматларни ўрганиб, уларни ҳаётда қўллаб, кўпчиликнинг таъбири билан айтганда, дунёнинг энг буюк савдогарига айландим. Бир пайтлар бу номаларни менга қолдирган одамларни ҳам шундай аташган. Эрасмус, эҳтимол анча вақт ўтиб, нима сабабдан узоқ йиллар давомида менинг айрим хатти-ҳаракатларим сенга ғалати, ҳатто мантиқиз туюлганининг боисини билиб олгандирсан. Лекин бу ҳаракатларнинг барчаси менга омад олиб келган. Бунчалик катта бойликни топиш учун фақат ўз ақл-идроким эмас, ушбу номалардаги ҳикматларнинг ҳам ҳиссаси катта бўлди.

– Сиз бу номаларни топширишингиз керак бўлган одам тезда қаршингиздан чиқишига ишонасизми?

– Ҳа,— деди Хафид номаларни сандиқقا солиб, унинг қопқоғини ёпаркан. – То ўша муддат келгунича сен менинг ёнимда бўласанми, Эрасмус?

Эрасмус дўсти тарафга бир қадам босди ва шу онда туйнукдан тушаётган ёруглик устида икки дўстнинг қўллари туташди. Эрасмус розилик аломати ўлароқ, бош иргади ва хужрани тарк этди. Шу билан бирга кекса Хафиднинг дўсти садоқатига бўлган заррача шубҳалари ҳам унинг юрагидан ўчиб кетди. Сандиқни аввалги жойига қўяркан, бир оз унинг тепасида туриб қолди ва кичкина минора томон одимлади. Кейин

томнинг дарчасидан ҳатлаб, қасрнинг баланд гумбазини ўраб олган ички панжара олдида тўхтади. Ташқаридан оқиб кираётган илиқ баҳор шабадаси унинг юзларини сийпалаб ўтди. Дунёнинг энг буюк савдогари шундайгина қаршисида ястаниб ётган Дамашқ манзарасига улуғвор табассум билан тикилган онда, хаёл аргумоғи уни олис ўтмиш сари олиб учди.





## ХАФИДНИНГ БОЛАЛИГИ

Зайтун тоғи узра қиши ўзининг қаттол ҳукмини юргизмоқда эди. Куддусдан бошланиб, Кидрон водийси томон узанган торгина сўқмоқлар бўйлаб, енгилгина тутун кўтарилиб турарди. Шамол олиб келаётган дудмал ладан (баъзи ўсимликлардан олинадиган, диний маросимларда тутатиладиган хушбўй смола) ва қовурилган гўшт ҳиди тоғда ўсаётган гиёхлар ва буталарнинг ачимтири ҳидига қоришиб кетганди. Тоғ ён-бағридаги ялангликда, Бетпаге қишлоғи яқинида тадморлик машҳур савдогар Патроснинг ҳашамдор карвони тунни ўтказиш мақсадида қўним топганди. Кеч тушиб қолган, савдогарнинг севимли жийрон оти ҳам ёқтирган эрмаги—писта япроқларини чайнашдан тўхтаб, дафна буталарига суюниб қолганди. Қатор саф тортган чодирлар ортида тўрт туп асрий зайтун дараҳтлари саф тортган, уларнинг шоҳларида йўғон каноп арқонлар осилиб турарди. Бу арқонларга одатда карвондаги уловлар боғлаб қўйиларди. Айни чоғда тужа ва эшакларнинг шарпаси олисдан қорайиб кўзга ташланар, жониворлар совқотмаслик учун бирбирининг пинжига кириб олганди. Фақат карвон юклари олдида қўриқчилик қилаётган икки соқчидан бўлак ҳамма уйқуга кетганди. Тиқ этган товуш эшлилмасди. Фақат Патроснинг эски терисидан ишланган каттакон чодирининг деворларида сирли соянинг ҳаракати кўзга чалинарди. Унинг ичиди хожанинг ўзи нимадандир норизо кайфиятда у ёқдан бу ёққа юарди. Патроснинг юзи буришиб кетган, оғир хўрсиниб нафас олар, бошини жаҳл билан чайқаб кўярди. Ниҳоят у ўзининг барваста

гавдасини тилла иплар билан тўқилган гилам устига ташлаб, йигитчани ёнига чорлади.

— Хафид, мендан бўлак ҳеч киминг йўқ, лекин мен сенинг ғалати илтимосингдан таажжубдаман. Сен кўлимда ишлаётганингдан хурсандмисан?

Йигитчанинг нигоҳлари гиламдаги мураккаб нақшларга муҳрланди.

— Эҳтимол бизнинг карвонимиз жуда кенгайиб кетгани сабабли сен туяларга қарашга қийналиб қолгандирсан?

— Йўқ, хожам.

— Унда марҳамат қилиб, менга тушунтириб бер-чи, сенинг бу кутилмаган, антиқа илтимосинг замирида қандай мақсад бор?

— Мен сизнинг молларингизни сотадиган савдогар бўлмоқчи эдим. Оддий туякаш бўлиб юравериш жонимга тегди. Мен сиздан мол олиб ўзларининг дўконида сотадиган Хадад, Симон, Калеб ва бошқа савдогарлар сингари ўз тижоратимни йўлга қўйишни истайман. Улар ҳам сизга, ҳам ўзларига катта даромад олиб келишяпти. Мен ҳам савдо билан шуғулланишни, аҳволимни ўнглаб олишни истайман. Туяларнинг ортидан қачонгача чорифимни судраб юраман? Мен сизнинг дўкондорларингиз қаторидан жой олсамгина, катта бойлик ва муваффақиятга эришаман.

— Нега бунча ишонч билан гапирияпсан?

— Сиздан кўп бор эшитганман: ҳар қандай одам савдогарлик туфайли қашшоқликдан бойликка томон интилиши мумкин.

Патрос бир оз ўлланиб турди ва йигитчага синчков назар солди:

— Сен Хадад ва бошқа савдогарлардек бўла олишингга ишонасанми?

Хафид ўз хожасининг қатъиятли нигоҳларидан кўзини узмасдан, жавоб қайтарди.

— Калеб ҳам бир пайтлар сизнинг олдингизга ўз моддий аҳволидан шикоят қилиб келганини неча мартараб эшитганман. Ахир сиз унга қайта-қайталаб, ҳар қандай одам истаса савдогар бўла олишини айтмаганмидингиз? Сиз савдо ишининг қонун-қоидаларидан хабардор бўлган ҳар бир одам яхши савдогар бўлса олади, деб айтгансиз. Агар сиз ҳамма аҳмоқ деб биладиган Калебнинг шу даражада омадли савдогар бўлишига ишонган экансиз, наҳотки мен ҳам тижорат сирларини ўзлаштира олмасам?

— Агар сен ҳам бу билимларни эгаллаб, савдогар бўлсанг, бу ҳаётдаги асосий мақсадинг нима бўлади?

Хафид бир оз чайналиб жавоб берди:

— Бутун жаҳонда сизнинг омадли ва бадавлат савдогар эканингизни билишади. Ҳали бу олам сизникидек улкан савдо салтанатини кўрмаган. Сиз машхур савдогарсиз, аммо мен ўз олдимга сиздан-да бой ва машхур бўлишни мақсад қилиб қўйганман. Мен дунёнинг энг буюк, энг бой ва энг машхур савдогари бўламан!

Патрос ёстиқقا ёнбошлиганча, йигитчанинг офтобда қорайган юзларига тикилди. Хафиднинг уринган кийимлари жониворларнинг терига ивиган, аммо унинг юзларидан алланечук исёнкорлик яққол акс этарди.

— Сен бундай катта савдо салтанатига, беҳисоб бойликларга эга бўлсанг, бунча давлатни нима қиласан?

— Бу ҳақда ҳам ўйлаб қўйганман. Энгаввало ўз оиламни ҳеч кимдан кам бўлмаслиги учун қўлимдан келганини қиласман. Қолганини муҳтоjlар, бева-бечоралар билан баҳам кўраман.

Патрос ажабланиб, қошларини чимирди.

— Ўғлим, бойлик ҳеч қачон биринчи ўринда турмаслиги ва ҳаётнинг асосий мақсади бўлмаслиги лозим. Сенинг гапларинг жуда чиройли ва ишонарли чиқди. Аммо, булар шунчаки қуруқ гап холос. Пулнинг бир учи билакда бўлса, иккинчи учи юракда бўлади. Шу боис, уни бошқалар билан баҳам кўриш осон кечмайди.

Хафид гапида туриб олди.

– Менинг хожам бадавлат эмасмилар?

Йигитчанинг гапини эшигтан савдогар кулиб юборди.

– Хафид! Мени моддийлик қизиқтира бошлағанидан бери, мен билан Ирод қасри деворлари остида тиланиб ўтирадиган гадойлар орасида битта йирик тафовут бўй кўрсатди. Гадой фақат бугунги қунини амаллаб ўтказиш ҳақида ўйлади. Мен эса эртанги қун нима ейишим мумкинлиги ҳақида ўй сурардим. Ўғлим, бойликка ҳирс кўйма, фақат фойданинг орқасидангина қувма. Сен фақат севиш ва севимли бўлишни ўз олдингга мақсад қилиб қўй. Асосийси, қалб хотиржамлиги ва гўзалликка интилиб яша.

Хафид яна ўжарликда давом этди:

– Бироқ, сиз айтган нарсаларнинг барчасига олтин керак бўлади-ку? Ахир қашшоқликда яшаб, инсон хотиржам бўлиши мумкинми? Наҳотки инсон йиртиқ яктак ичида, бўш ҳамён билан ўзини баҳтиёр сеза олса? Ейишга ноним, кийишга кийимим, бошимда бошпанам бўлмаса, менинг оиласига бўлган муҳаббатим бир чақалик қимматга эга эмас-ку? Ахир сиз атрофингдагиларга хурсандчилик улаша олган бойликкина ҳақиқий хазинадир, демаганмидингиз? Унда нима учун менинг бойликка интилишим ёмон иллат бўлади? Фақирлик фақатгина Парвардигорнинг ризоси учун сахроларни яланг оёқ кезиб юрган авлиёгагина зийнат баҳш этар. Чунки унинг ўзидан бошка бойлиги йўқ. Менимча, фақирлик ё бирор нуқсон, ё қобилият, ё такаббурликдан дарак беради.

Патрос хийла қовоқ уйиб, бир оз жим қолди ва деди:

– Сенинг томдан тараша тушгандек бу иддаоларингнинг боиси не? Сен оиласининг фаровонлиги ҳақида гапирияпсан. Ахир сенда оиласининг ўзи бўлмаса. Отаонанг ўлатдан вафот этишгач, сени асраб олганимни яхши биласан.

Хафиднинг қуёшда қорайган териси унинг хижолатдан юзига тепган қоннинг алвон рангини яширолмади.

— Бу сафарга чиқмасимииздан олдинроқ... биз ҳали Ал-Халилда турганимиизда, мен Калнекхнинг қизини учратиб қолдим. У... у...

— Э, мана гап қаерда экан! Энди тушундим ҳаммасини. Қандайдир баландпарвоздар гоялар эмас, айнан муҳаббат менинг соддагина тұякаш боламни бутун жағонға довруғ солишиша тайёр жасур жангчига айлантирибди. Калнек афсонавий бойликлар әгаси. У қизини чўпонга бермайди. Фақат ёш, бой ва чиройли савдогарни күёв қилиши мумкин. Ана шунақа. Баракалла, азамат! Мен сенга савдода муваффақият қозониш йўлларини ўрганишингда ёрдам бераман.

Хафид миннатдорчилик юзасидан тиз чўкиб, Патроснинг этагини ўпди.

— О, марҳаматли хожам! Сизни Худо ёрлақасин! — дея хитоб қилди у. — Сизнинг бу олийжаноблигингизга қандай жавоб қайтарсан экан?

Савдогар этагини йигитчанинг чангалидан оҳиста бўшатди.

— Миннатдорчилик билдиришга шошилмасанг ҳам бўларди. Сенга кўрсатган энг катта ёрдамим ҳам ўзинг енгиб ўтишинг керак бўлган тўсиқлар, ўзинг мустақил равишида қилишинг керак бўлган ишлар олдида денгиздан томчи ҳам бўлмайди.

Хафиднинг кўзларида чақнаган қувонч ёлқини сўнди.

— Сиз мени дунёдаги энг буюк савдогар бўлиш сирлари, қонун-қойдалари билан таништирмайсизми?

— Сенга ҳеч қачон ҳеч нарсани ўргатмайман, — деди Патрос. — Шусиз ҳам менинг қанотим остида болалик йилларинг анча сокин ва енгил ўтди. Сени анчагина эркалатиб ҳам қўйдим. Орқаваротдан келаётган гап-сўзларга кўра, сенинг тұякашлиқдан юқорироққа кўтарилишингга тўсқинлик қиласмишман. Менимча,

агар одамнинг юрагида кичик бир учқун бўлса бас, у қачондир алангага айланади. Агар ўша учқун бўлса, ўша бола эртами-кечми, ҳақиқий эркак бўла олади. Унутма, олдингда катта машаққатлар турибди. Демак, энди сен ўслирин эмас, катта эркак сифатида ишлашинг керак. Сен ана шундай қийинчиликларга тайёрмисан? Сенинг бугунги илтимосинг мени анча қувонтирди. Бугун кўзларингда ғуур учқунларини кўрдим. Ажойиб, мен сенинг фикрларингга қўшиламан. Бироқ бу гапларинг ҳавога учмаслиги, алалоқибат ўз исботини топиши керак.

Хафид жим қолди, Патрос эса давом этди:

— Сен аввало, тижоратнинг барча қийинчиликларига бардошинг етишини менга, янада аникроғи, ўзингга ўзинг исботлашинг керак. Бу иш эса, камдан-кам одамларнинг қўлидан келади. Такрор бўлса ҳам айтаман, буюк мукофотлар учун бир эмас, бир нечта мураккаб ишларни бажариш керак. Баъзилар бошларига тушган арзимас ташвишларни енгиб ўтиб, ўзларини бойликка эришиш учун етарлича тажрибага эга бўлдим, деб ҳисоблашади. Бошқа бирорлар эса, ўз йўлларида учраган ҳар бир муаммони малъун, ашаддий душман ўрнида қабул қилишади. Аслида эса, бу мешаққатлар уларнинг содик дўстлари ва ёрдамчилари эди. Тўсиклар — муваффакиятга эришишда, жумладан савдо ишида ҳам жуда зарур. Асосий нарсани унутмаслик керак — ғалаба жуда кўп ва катта талафотлар ортидан етиб келади. Бинобарин, ҳар бир тўқнашув, ҳар бир инқироз савдогарнинг кучи ва маҳоратини чархлайди, уни чиниқтиради, совуқкон ва жасур қилиб тарбиялайди. Тажриба шу тахлит орта боради. Демак, ҳар бир мешаққат — сенинг чапани дўстинг. У сени ё ҳаммадан юксакликка кўтаради, ё четга чиқариб қўяди. Ҳар бир тўсиқ — бу комилликка олиб чиқувчи нарвоннинг бир поғонаси, қисматнинг бир чақириғи ва агар сен жавоб қайтариш учун ўзингда куч топа олмасанг, қийинчиликлардан қочсанг, улардан юз

үгирсанг, билиб қўй, сен ўз келажагингни барбод қилган бўласан!

Йигитча бош иргаб, жавоб бериш учун оғиз жуфтлаганида, кекса савдогар қўлини кўтариб, уни тўхтатди.

– Ҳали энг асосийсини айтмадим. Сен ўзингни бахш этмоқчи бўлган қасб мунтазам ёлғизлик билан боғлиқ. Ҳатто оддий солиқ йиғувчи ҳам кун ботиши билан уйига қайтади. Гарчи казармани уй деб аташ қийин бўлса-да, Рим аскарининг ҳам ўз уйи бор. Бироқ сен ойлаб кун ботиши-ю, тонг отишини дўстларингдан, яқинларингдан узоқда қарши оласан. Айниқса, бирор кулба олдидан ўтаётib, баҳтиёр оиланинг кечки овқат устида жамулжам ўтирганини кўрсанг, юрагингни соғинч тимдалай бошлайди. Бу оламда ёлғизликдан ҳам ёмонроқ нарса йўқ, – деда оғир хўрсинди Патрос. – Сени олдинда ана шундай синовлар кутиб турибди. Сенинг муваффақиятинг ушбу синовларни қанчалик тез ва осон енга олишингга боғлиқ. Йўлларда ҳамиша сенга кўркув ҳамроҳ бўлади. Қалин ўрмонзорларда, ҳувиллаган биёбонларда ҳам ёлғиз бўласан. Кўп ҳолларда савдогарлар соғинч ва ташвиш ичиди ўз мақсадларини унугиб қўядилар ва ёш боладек ғамхўрлик, меҳр истаб қолишади. Бу туйгулар унинг бутун ўй-хаёлларини эгаллаб, бошқа мақсадларни сиқиб чиқаргудек бўлса, савдогар ўз кучи, мавқеини йўқотади. Минглаб иқтидорли савдогарлар ана шу туйгулардан енгилиб, ўз иқтидорини курбон қилишган. Бундан ташқари, гавжум шаҳарларда ҳам сен ёлғиз бўласан, ҳеч ким сенинг қалбингни қувонтиrmайди, ҳеч ким сенга тасалли бермайди. Айрилиқ азобида ўртанаётганингда ҳеч ким дардингга малҳам бўлолмайди. Фақат гоҳида сени ҳамёнингдан жудо қилишга чоғланганлар учраб туради.

– Мен жуда эҳтиёткор бўламан ва насиҳатларингизни асло унутмайман.

– Начора, унда сенга бу ҳақда бошқа умуман оғиз очмайман. Демак, сен ўзингни савдода синаб кўрмоқ-чисан. Унда билгинки, сен ҳозир ғўр мевасан, ҳатто мева деб аташ ҳам қулгили. Фақат пишиб етилганда мевага айланасан, ҳар бир савдогарга керак бўладиган даражада билим ва тажриба тўплайсан.

– Қачон иш бошлишим мумкин?

– Эрталаб, ушбу сұхбатимиз ҳақида Сильвиога айтсанг, у сенга энг яхши иплардан тўқилган, қалин ёпинчиқлардан бирини беради. Унинг матоси эчки жунидан тўқилган бўлиб, ҳар қандай ёғингарчиликка дош беради. Унинг қизил рангли бўёғи рўян илдизидан олинган. Ёпинчиқнинг бир четидаги митти юлдузча тасвири унинг ушбу маҳсулотни тайёрлашда бутун дунёда биринчи ўринда туродиган Толи ҳунармандлари қўлидан чиққанини билдиради. Юлдузча ёнидаги тўртбурчак тасвири эса менинг муҳрим ҳисобланади. Ҳар икки белги ушбу маҳсулотнинг харидоргирлигини таъминлайди. Бир пайтлар мен бу ерга ана шундай ёпинчиқлардан мингтасини олиб келиб сотганман. Мен яҳудийлар ичida жуда кўп савдо қилганман, улар бундай ёпинчиқни або деб аташади. – Патрос бир оз тин олди. – Бигта хачирга ўтириб, ана шу ёпинчиқлардан бирини ол-да, Байт-Лахм (Вифлеем) шаҳрига жўна. Бу шаҳарни бизнинг карвон четлаб ўтганди. У ерда яқин орада менинг савдогарларимдан ҳеч бири бўлмаган. Бу шаҳарда савдо қилиш вақтни бефойда ўтказиш билан баробар дейишади, лекин мен уларга негадир ишонмадим. Бу ерда маҳаллий чўпонлар билан савдо қилганман, улар бундай ёпинчиқларни жон деб олишади. Хуллас, Байт-Лахмга югур ва ёпинчиқни сотмасдан қайтиб келма.

Хафид қувончини сездирмасликка тиришиб, бош ирғади. У ўзининг ilk тижорат сафарига чиқиш учун ошиқарди.

– Мен бу ёпинчиқни қанчага сотаман, хожам?

— Мен ўз ҳисоб-китоб дафтаримга сенинг номингни ёзиб, унинг тўғрисида қарзингни — бир дирҳам деб ёзиб қўяман. Ана шундан ортиққа сотолсанг, фойдаси ўзингда қолади. Бошқача айтганда, сен бу маҳсулотга истаганингча нарх қўйгин ва истаган ерингда сотишинг мумкин. Бозор шаҳарнинг жанубий дарвозаси олдида жойлашган. Шунингдек, ёпинчиқни кўчаларда юриб ҳам сотсанг бўлади. Истасанг, уйма-уй юриб сот. Йўлингда минглаб уйлар учрайди. Лекин ҳар қалай сен бу матони гавжум жойларда олиб юрсанг сотишинг осонроқ бўлади. Тушундингми?

Хафид тасдиқ маъносида бош иргади. Хожасининг гаплари унинг қулоғига деярли кирмас, у ўзини аллақачон Байт-Лахм бозорида юргандек ҳис этарди.

Патрос кўлини йигитчанинг елкасига қўйиб уқтириди.

— Сен қайтиб келгунингча ҳеч кимни ўрнингга ишга олмай тураман. Агар сендан савдогар чиқмаслигига ишонч ҳосил қиласанг, иккиланмай ёнимга қайтавер. Асло ташвиш тортма. Мен сени тўғри тушунаман. Қайсиdir касбга лойиқ бўлолмаслик бу фожия эмас. Сен нимагадир уриниб кўрсанг ва бундан ҳеч нарса чиқара олмасанг, асло уялиб ўтирма. Сенинг бу ҳаракатинг ҳеч нарса қилмасдан вақтини бекорга ўтказган одамга нисбатан минг чандон яхшидир. Сен қайтиб келганингдан кейин ҳаётингни қай тариқа давом эттириш ҳақида биргалашиб ўйлаб кўрармиз.

Хафид таъзим қилиб, кетишга чоғланганида, хожаси яна уни тўхтатди:

— Ўғлим, — дея давом этди у. — Сен янги ҳаёт бошлайпсан. Яна бир насиҳатимни тингла ва уни ҳеч қаҷон унутма. У сенга йўлда учраган энг қийин муаммоларни ҳам осонгина енгиб ўтишингда ёрдам беради.

— Яна қандай маслаҳат бермоқчисиз менга, хожам? — сўради Хафид.


— Агар сен омадингни излаб йўлга чиққан бўлсанг ва унга эришишингта ишончинг комил бўлса, тўсиқлар олдида туриб қолма ва уни ошиб ё айланиб ўтишга ҳракат қил, — деди Патрос ва йигитчага яқинлашди. — Сен менинг гапларимни яхшилаб тушуниб олдингми?

— Ҳа, хожам.

— Ҳамма гапларимни эсингда сақлайсанми?

— Ҳа, — деди Хафид. — Менинг қарорим қатъий ва ҳеч бир ғов менинг йўлимни тўса олмайди.





## БАЙТ-ЛАХМГА ҚИЛИНГАН САФАР

Хафид бир бурда нонни чайнаркан, ўзининг аччик қисмати ҳақида ўйларди. Патрос унга ёпинчиқни со-тиш учун тўрт кун муҳлат берди. Эртага бу муддат ту-гайди. Хафид уч кунни Байт-Лахмда ўтказди. Бироқ ўз хожасидан катта ваъдалар ва ўзига ишонч билан олгани — биргина ёпинчиқни сота олмади. У айни чоғда шаҳар девори яқинидаги бир ғорда, бўхласини ёнига қўйганча, хаёл суриб ётарди. У ёпинчиғини бир бўхчага туғиб, карвонсарой яқинидаги ғорда, хачирининг ёнига ташлаб келганди. Хафид стол атрофида ўтирган одамларнинг гап-сўзларини эшитмас, ўз хаёллари билан банд эди. Олдида турган овқатга ҳам қўл урмаганди. Йигитчани дунё яралганидан бери барча савдогарларга таниш бўлган шубҳа-гумонлар қийнарди: “Нега мени эшитишмаяпти? Мен одамларнинг эътиборини қандай тортсам бўларкин? Нега кўпчилик ҳали мен гапимни айтмасимдан эшикни ёпиб олишяпти? Нега мен йўловчиларни тўхтатиб, ўз молимни уларга таърифлай бошлаганимда, мендан юз ўгиришяпти? Менинг молим билан ҳеч ким қизиқиб кўрмади. Ёки бу ернинг одамлари ўзлари учун энг керакли нарсани сотиб ололмайдиган даражада камбағалми? Ҳа, аслида кўпчиликнинг бу нарсани сотиб олишга қурби етмайди. Лекин бошқалар бу ерда қандай қилиб савдо билан шуғулланишаркин? Нега мен бирор дарвоза олдида тўхтасам, юрагимни алланечук ваҳима босади? Уни қандай енгсам экан? Балки мен бу ёпинчиқка жуда қиммат нарх қўйгандирман? Балки бошқа савдогарлар бу молни арzonроқ нархда пуллаётгандир? Хафидни ўз-ўзидан қониқмаслик, ҳатто нафрат ҳисси тобора чуқурроқ

қамраб ола бошлади. У ҳамма учун зарур маҳсулотни сота олмагани учун ўз-ўзидан жаҳли чиқарди.

Хафид энди ўзи танламоқчи бўлган касбга номуносиб эканини англай бошлаганди. У бир неча бор, ҳаммасини йиғиштириб, тинчгина түякашлигини қилиб юриш ҳақида ўйлаб кўрди. Ўша ишнинг орқасидан беш-тўрт чақа бўлсаям топиб юрганди. Ҳозир эса Патрос майдачуда харажатлар учун берган пулларни ҳам харжлаб бўлди. Хафид энди ёпинчиқдан сотиб фойда қилиш ҳақида ўйламай ҳам қўйганди. Ўз нархига сотса ҳам майли эди. Ҳар қалай хожаси уни савдогар сифатида тан олармиди?

Нима бўлганда ҳам у карвонга ёпинчиқсиз қайтиши шарт. Ўшанда Патрос уни нима деб атаганди? Ёш жангчи деганмиди? Хафид кинояли илжайди: “Мен жангчи эмишманми?”

Шу чоқ беихтиёр у ўз туялари олдига қайтгиси келди. Кейин эса, дафъатан хаёллари Лиша томон кетди. У билан бирга қизнинг бадқовоқ отаси ҳам кўз ўнгида гавдаланди. Калнек! Шунда унинг ҳамма гумонлари эриб битгандек бўлди. Унинг ёнидаги чақалар жуда оз қолган, уларни тежаб қолиш учун бугун ғорда қолишга қарор қилди. Лекин унинг эртага қандай бўлмасин ёпинчиқни сотиш ҳақидаги қарори янада қатъйлашган эди. Тезда бу қарори мутлақ ишонч тусини олди. У эртага молини шундай мақтайдики, уни албатта яхшигина пулга сотиб олишади. Хафид савдони эрта сахарлаб бошлайди. Шаҳар дарвозаси олдида туриб олади, чунки шаҳардаги энг гавжум жой ўша ер. Бу ердан жуда кўп одам кириб чиқади, демак жуда борса пешингача сота олади. Кечга яқин эса кумуш танга билан карвон тўхтаган Зайтун тоғига йўл олади.

Бу фикридан Хафиднинг кўнгли худди молини аллақачон пуллаб бўлгандек кўтарилиб кетди. Бу хурсандчилик унинг иштаҳасини ҳам очиб юбордими,

апил-тапил овқатланиб олди. Устози ҳам шогирднинг илк муваффакиятидан роса кувонса керак. Балки Хафид билан фахрланар? Йўқ, Хафид устозининг юзини ерга қаратмайди, у албатта омадли савдогар бўлишнинг уддасидан чиқади.

Албатта, биттагина маҳсулотни сотиш учун тўрт кун жуда кўплик қилишини Хафид тушунарди. Аммо, бу ҳали бошланиши-ку? Патрос унга бунақа маҳсулотларни янада тезроқ, уч, икки кунда сотиш йўлларини ҳам ўргатади. Ҳали шу даражада тажрибаси ошиб кетадики, бир соатда бунақа матоларнинг бир қанчасини сата олади. Шу тариқа қачондир унга ҳам ҳақиқий шоншуҳрат кулиб боқади.

Хафид сершовқин карvonсаройни тарк этиб, форга йўл олди. Йигитча кетиб бораркан, унинг сандаллари остидан қиров босган ўтларнинг нолон ғижирлаши эшитиларди. Хафид бугун хачирининг ёнида, форда тунашни кўзлаганди. Эртага Хафид учун энг бахтли кун бўлиш аниқ. Гарчи у эндиликда бу овлоқ шаҳарни савдогарлар нима сабабдан четлаб ўтишини тушунган бўлса-да, унинг албатта омади чопади. Гарчи кўпгина савдогарлардан, байт-лахмлик харидорлардан кинояли гап-сўзлар эшитган бўлса-да, Хафид бу гапларни кулибгина эсга олади. Агар Патрос бир неча йил аввал бу ерда юзлаб ёпинчиқларни сата олган экан, нега энди Хафид лоақал биттагинасини сата олмаса?

Яна ким билсин... балки ўтган йиллар мобайнида бу ерда ҳам кўп нарса ўзгаргандир? Қолаверса, Патрос ёшлигига ҳам ақлли ва омадли савдогар бўлгандир?

Йигитча илкис қадамларини тезлатди. Борди-ю, форга майда ўғрилардан бирортаси кириб қолган бўлса-чи? Хафид ўзини кутилмаган олишувга руҳан тайёрлаб, ўзига таниш тирқиши томон ошиқди. Хафид бу ерда қимматбаҳо ёпинчиқни олиб кетишни кўзлаётган муттаҳам ўғрини

кўраман, деб ўйлаган эди, аммо тамомила бошқа манзаранинг устидан чиқди.

Хафид ғорга киаркан, вужудидаги ноҳуш ҳислар ўрнини алланечук ёруғлик, енгиллик эгаллаётгандек бўлди. Хира ёруғлик остида у ҳайратдан донг қотиб қолди. Фор деворидаги кичик бир токчага шам қўйилганди. Унинг заиф ёғдусида соқолли эркак ва бир ёш аёлнинг ғира-шира қиёфаси кўзга ташланарди. Улар совуқдан қалтираб, бир-бирининг пинжига тиқилиб ўтиришарди. Уларнинг оёқлари остида, чорвадорлар чорва озуқасини тайёрлайдиган япаски тош устида чақалоқ ётарди. Хафид табиий тарзда чақалоқнинг эндигина туғилганини англади: гўдакнинг қип-қизил жиш териси бужмайиб кўринарди.


Болани совуқдан ҳимоялаш учун эркак ва аёл ўз кийимлари билан гўдакнинг устини ўраб қўйишган, аммо бу увада кийимлар чақалоқнинг бошини ўрашга етмай қолганди. Хафидни кўриши билан ҳалиги эркак айборона жилмайди. Аёл йигитчага хийла шубҳали тикилди, кейин худди кутилмаган қўноқдан жигарпорасини ҳимоя қилмоқчи бўлгандек унга қўл узатди. Ҳамма жим, ҳеч кимнинг товуши чиқмасди. Аёлнинг қанчалик совқотаётгани унинг кўкариб кетган юз-кўзларидан ҳам аён эди. Чақалоқ ҳам увада кийимлар ичida совқотаётгани аниқ эди. Фор эса зах тортиб ётибди. Хафид тош устида ётган чақалоқقا, унинг уйқусида жилмаяётган оғизчасига термилди. Балки Хафидга шундай туюлгандир? Унинг вужудини галати ҳиссиёт қамради. Дафъатан Лишани ёдга олди. Фор оғзидан оқиб кираётган изгирин аёлнинг ихчам вужудини янада жунжиктириб қўйганди.


Бундан Хафиднинг юраги яна эзилди.

Бир неча дақиқалик сукунатдан сўнг, бўлажак савдогар хачири тарафга юрди. У хуржун ичидаги тутунни чиқарди. Эркак ва аёл Хафиднинг ҳаракатларини

ҳам қизиқиши, ҳам хавотир билан кузатиб туришарди. Йигитча тугунчани очиб, ичидан ёпинчиқни чиқарди. Шамнинг хирагина ёғдусида ҳам мато четидаги тамғалар яққол кўриниб турарди. Байт-Лахмда ўтган уч кун ичида Хафид бу матонинг ҳар бир чоки ва нақшини ўрганиб олганди. Чунки у ушбу матони қўлида неча соатлаб бесамар кўтариб юрганди. Ёпинчиқ ростдан ҳам ўта пишиқ тўқилган бўлиб, у ўн йиллаб ўз соҳибига хизмат қилиши мумкин эди. Хафид кўзини юмиб, хўрсинди. Кейин яна эркак ва аёлга кўз ташлаб, ухлаб ётган чақалоқ томон юрди.

Хафид боланинг устига ташлаб қўйилган эркак ва аёлнинг кийимларини ўзларига қайтарди. Аёл ҳам, эркак ҳам унга ҳамон таажжуб билан тикилиб туришарди. Йигитча ёпинчиқни очиб, унга чақалоқни эҳтиёткорлик билан йўргаклади. Йигитча кеч тушганига қарамай, горнинг оғзи худди кундузгидек ёришиб кетганидан ажабланди. Хафид осмонга қараб, фавқулодда ёрқин нур таратаётган юлдузни кўрди ва кўзлари қамашиб кетди. Бироқ, кўзлари ёшлангунча ундан кўз узмади. Сўнг бошини қуи солганча, карвон қўним топган водий томон йўл олди.





ВОБ

## ЭҲСОН ҚИЛИНГАН ЁПИНЧИК

Хафид тепасида чараклаб йўлини ёритиб турган юндузга эътибор бермасликка тиришиб, ўз карвонига ошиқарди. У паришонхотирлик билан оҳиста одимларди. Уни бундай аҳмоқона йўл тутишга нима ундали? Ахир у форда учратган одамларини танимасди-ку? Нега қимматбаҳо ёпинчиқни сотиш ўрнига уни садақа қилиб юборди? Патросга ва қолганларга нима дейди энди? Унинг гапини эшитганлар ётиб олиб кулмайдими?

О, сенга ишониб топширилган қиммат молни дуч келган одамларга эҳсон қилиш — бу янги савдогар учун қойилмақом ибтидо. Форда кимнингдир боласига ичи ачишганмиш! Хафид шу каби истеҳзоли гапларни эшитиши аниқ. Шу боис уларга бошқа, ишонарлироқ баҳона тўқиб бориши керак. Шундай гапирсинки, Патрос унга чиппа-чин ишонсин. Очиги у Патросга ҳақиқатни айтиб, хожасидан маломатга қолишни истамасди. Балки йўлда қароқчиларга дуч келдим деса тўғрироқ бўлар? “Мен йўғимда хачирнинг хуржунидаги матони ўғрилар шилиб кетибди”, деса-чи? Патрос бу чўпчакларга ишонармикин? Балки ишонар? Ахир ҳозир ҳамма бурчакда ўгри-ю, қароқчилар изғиб юрган бўлса? Ҳар қалай эҳтиётсизлик сабабли айбланиш савдодаги нўноқлик боис маломатга қолишдан афзалроқ. Мана ниҳоят, Хафид ўзига таниш сўқмоққа ҳам етиб келди. Буёғига оз қолди. Мана, Гефсиман боғи ҳам кўриниб турибди. Ундан нарёғида эса, карвон жойлашган. Хафид нохуш учрашувни тезлаштириш учун хачирини қичади. Шундагина Хафид атрофи кундузгидек чароғон эканини пайқади. Дафъатан унинг қалбига кувонч тўлқини

ёпирилиб кирди. Бироқ карвонга яқинлашиб, Патросни кўриши билан бу қувонч ўрнини яна ташвиш эгаллади.

Патрос ўз чодирининг ёнида осмонга тикилиб турарди. Хафид четроқдан туриб хожасини кузатаркан, унинг назарига тушмасликни ич-ичидан тиларди. Аммо йигитчанинг бу тилаги амалга ошмади. Патрос унга қараб кела бошлади. Йигитча ўз хожасининг овозидан хайриҳоҳлик ифодасини уқди:

– Сен Байт-Лахмдан келяпсанми?

– Ҳа, хожам!

– Сени таъқиб қилиб келаётган анави юлдуз сенга ғалати туюлмадими?

– Юлдуз? – елка қисиб сўради Хафид. – Мен... эътибор бермабман.

– Эътибор бермадинг?! – ажабланди Патрос. – Бу юлдуз икки соат илгари Байт-Лахм устида пайдо бўлди, ўшандан бери ундан кўз узмай ўтирибман. Шу пайтга қадар ҳали бундай ёрқин ва чиройли юлдузни кўрмагандим. Ўша ондан бери бу юлдуз Байт-Лахмдан бизнинг карвонга қараб ҳаракатланиб келаётир. Қара, у бизнинг устимизда нур сочаётир. Сен тўхтаганинг учун у ҳам тўхтаб қолди, – Патрос йигитчанинг юзига тикилди. – Айт, ўғлим, Байт-Лахмда нима қилдинг? Бирор ғайриоддий воқеага дуч келдингми?

– Йўғ-э, хожам?

Кекса савдогар кўкка ўйчан тикилиб туарди:

– Ҳали умримда бундай антиқа туннинг шоҳиди бўлмагандим. Бугун ҳаммаси менга сирли туюляпти: манави юлдуз, юрагимдаги жўшқин ҳислар...

Хафид кўзларини айбдорона пирпиратди.

– Мен ҳам бу тунни ҳеч қачон унутмасам керак.

– О, кўриб турибман, ниманидир яширяпсан. Нега бунча кеч қайтдинг?

Хафид ҳамон жим эди. Кекса савдогар хачирнинг хуржунини пайпаслади:

– Бўм-бўш! Лоақал битта савдогаримнинг иши юришибди-ку? Юр, менинг чодиримга! Бунга қандай эришганингни айтиб берасан. Агар Парвардигорнинг ўзи тунни кунга айлантиришни истаган бўлса, мен ҳам ухламай қўя қоламан. Балки, сени изингдан келаётган анави юлдузнинг сирини менга айтарсан?

Хафидни кўқдаги юлдуздан кўра ичидаги ташвишлари кўпроқ ўйлантиради. Ана шу ташвиш билан чодир томон юрди. Патрос юмшоқ болишига суюнганча, шогирдининг ҳикоясини тинглаш учун кўзларини юмди. Хафид ҳаяжон билан Байт-Лахмда кўрганларини ҳикоя қилишга тушди. У билан гаплашишни истамаганлар, шаънига ёғдирилган таҳқирлар ҳақида гапирди. Шунингдек, у йиглагудек бўлиб, бир кулол уни ўз ҳовлисидан қувиб солгани, римлик бир аскар ёпинчиқ нархини туширмагани учун шу матоҳни юзига итқитганини сўзлади. Патрос унинг ҳикоясини тингларкан, гоҳида ҳамдардлик билан бош ирғаб қўярди. Мана, ниҳоят у карvonсаройда ўз иқтидоридан шубҳага тушган онларига етиб келди.

Патрос илкис йигитчанинг гапини бўлди:

– Хафид, илтимос, ўша онда миянгга нима келган бўлса, ҳаммасини гапириб бер.

Хафид хожасининг айтганини қилиб, ўша дамдаги кечинмаларини бир бошдан гапириб берди.

– Қайси фикр сенинг ўзингга нисбатан шубҳалингни тарқатиб юборди? – сўради Патрос.

Хафид бир зум ўйланиб, қатъий жавоб қайтарди.

– Ўша дамда Калнекхнинг қизи эсимга тушди. Бадбўй карвонсаройда ўтиарканман, бу аҳволда мен Лишанинг висолига ҳеч қачон етолмаслигимни англадим, – деди Хафид овозидаги титроқни аранг босиб. – Энди эса, сизнинг ишончинингизни оқлай олмаганимдан сўнг, у қизни мутлақо унутиб юборсам ҳам бўлади.

– Нега? – деб сўради Патрос. – Ёпинчиқ йўқ, сен уни сотгансан!

Хафид шу қадар паст овозда гапирадики, Патрос унинг овозини яхшилаб эшитиш учун эгилиб қулоқ тутишга мажбур эди. Хафид унга горда юз берган ҳодисаларни бир бошдан айтишга тушди. У гапидан тўхтамас, ёрқин юлдуз эса, чодир дарчасидан мўралаб, ичкарини ажиг нури билан ёритарди. Борган сари чолнинг серажинюзида ёқимли табассум ёйилиб бораарди. Йигитча ҳикоясини тугатиб, оғир хўрсинганидан сўнг, чодир ичига улуғвор сукунат чўқди. Хафид бошини кўйи солиб ўтирас, хожасининг кўзларига қарашга-да, журъат этолмасди. Уни тушкунлик тамомила чулғаб олганди. Ахир у топширилган вазифани уddyalай олмади, шарманда бўлди, энди эса ўзининг ҳақир қисматига бўйин эгишдан бошқа чораси йўқ. У уятдан ўзини қўярга жой тополмай, югуриб чодирдан чиқиб кетмоқчи бўлганида, хожа унинг елкасидан тутиб қолди.

— Менга қара, — Хафид аранг бошини кўтарди. — Ўғлим, илк тижорий сафаринг сенга бирор фойда олиб келмади.

— Ҳа, хожам,— деди Хафид бўғиқ овозда.

— У менга фойда келтирди. Сенга эргашиб юрган бу юлдуз мени узоқ йиллик шубҳаларимдан ҳам, кўзимни қоплаган пардадан ҳам халос этди. Нега? Нима бўлди? Бунинг сабабини мен сенга Тадморга борганимиздан сўнг айтаман. Энди эса, сендан бир илтимосим бор. Эшит.

— Илтимос? — ажабланди Хафид. — Сиз менга буюрсангиз бас, хожам.

— Тонгга қадар менинг савдогарларим қайта бошлайди, уларнинг уловларига қарашга тўғри келади. Сен аввалги ишингни давом эттирасанми?

Хафид сапчиб турди ва валинеъматига қуллуқ қилди.

— Амрингизга мунтазирман, хожам, — деди у итоаткорлик билан. — Мени афв этинг, сизнинг ишончингизни оқлай олмадим.

— Унда бориб, ҳозирлигингни кўравер, тонгга яқин савдогарлар қайтишади. Биз эса, сен билан Тадморда гаплашамиз.

Хафид чодирдан чиққанида тепасидаги юлдуз яна унинг кўзларини қамаштирди. Йигитча кўзларини кафти билан бекитди. Шу онда уни яна ортидан Патрос чақирди. Хафид қайтиб яна хожасининг амрига шай турди. Патрос туриб Хафидга яқинлашди ва унинг елкасини қоқди.

— Хавотир олма, ўғлим. Тунинг осуда ўтсин. Сен ҳеч нарса ютқазмадинг, балки ютдинг.

Хафид ҳеч нарсани тушунмай, чодирни тарк этди. Ёрқин юлдуз ҳамон борлиқни нафис ёғдулари билан ёритиб турарди.





## СИРЛИ НОМАЛАР

Карвон Тадморга етиб келганидан сўнг, орадан икки ҳафта ўтди. Ишлар билан бўлиб, Хафид хожасининг гапини ҳам эсидан чиқараёзди. Бироқ, кунларнинг бирида хожасининг югурдаги келиб, уни уйғотди ва Патрос йўқлаётганини айтди. Хафид унинг учун тўшак вазифасини ўтаб келаётган сомон уюми устидан туриб, кийим-бошини қоқди-да, хизматкорнинг ортидан эргашди. Уни Патроснинг ётоғига олиб киришди. Хафид серҳашам хонага киаркан, хожаси ётган каравотдан анча берида тўхтаб, таъзим қилди.

Патрос кўзларини очди-да, қоқсуяк қўлларига таяниб, гавдасини кўтарди. Хожанинг юzlари қордек оқариб кетган, қоқсуяк қўлларидағи томирлари бўртиб турарди. Хафид ўзининг аввалги хожасини аранг таниди. Охирги учрашувларидан бери орадан бор-йўғи 12 кун ўтган, бедаво дард аллақачон ўз ишини қилганди.

Патрос қўлини аранг кўтариб, Хафидга ўтириш учун жой кўрсатди. Йигитча жойлашиб олгач, Патрос гап бошлади:

— Ўғлим, орадан бир неча кун ўтди. Бу вақт ичидা сен келгусидаги режаларингни қайта кўриб чиқдингми? Сен ҳозир ҳам ўзингга ишонасанми? Савдогар бўлиш фикридан воз кечмадингми?

— Йўқ, — тан олди Хафид.

Патрос бош ирғади.

— Унда гап бундай, — деди у. — Мен сенга кўпроқ вақт ажратмоқчи эдим. Аммо, кўриб турибсанки, режалар ўзгариб кетди. Гарчи сен мени яхши савдогар ҳисобласанг-да, битим тузишга лойиқ деб билсанг-да,

мен ўлим билан келишолмаяпман. У худди ёввойи мушук сингари эшигимни тимдалаяпти. Ўзинг биласанки, ажалдан омонлик йўқ.

Илкис бошланган йўтал Патроснинг гапини бўлиб қўйди. Хафид унинг даҳшат ичида ютоқиб нафас олишини кузатиб турарди. Йўтал тўхтагач, Патрос заифгина кулимсиради.

— Менинг вақт-соатим ҳисобли, кел тезроқ ишга ўтайлик. Аввал, каравотимнинг тагида турган заранг сандиқчани бу ёқقا ол.

Хафид эгилиб, пастда турган, тасмалар билан боғланган сандиқчани олди. Кейин уни кўрпа устига, хожасининг оёқ томонига қўйиб, ўз ўрнига қайтди.

Кекса савдогар йўталиб, гапида давом этди:

— Мен кўп йиллар аввал түякашлиқдан ҳам қуйироқ ишларни бажариб юрган бола эдим. Менинг чекимга Шарқдан келаётган бир йўловчини қароқчилар ҳужумидан халос этиш тушганди. Ёшлигимда жуда бақувват йигит эдим. Қароқчилар билан курашиб мен учун у қадар катта машаққат туғдирмади. Мен ўшандা шунчаки бурчимни бажардим, деб ўйлагандим. Шу пайт ҳалиги йўловчи мени тўхтатди ва бу яхшиликнинг мукофотини олишимни сўради. У пайтда на оиласам, на мол-давлатим бор эди. Йўловчи мени ўз уйига олиб кетди. Мени янги танишимнинг яқинлари, оила аъзолари эски қадрдонлар сингари кутиб олишди. Кунларнинг бирида мен янгича ҳаёт тарзига буткул кўнишиб бўлганимда, у менга мана шу сандиқчани кўрсатди. Унинг ичида ўнта терида битилган номалар жойланган эди. Биринчи номада сирларни англаш йўриқномаси акс этган, қолганлари савдода катта муваффақият қозонишнинг сирлари ва қоидаларидан иборат эди. Кейин йил давомида мен устозимнинг кўмагида ушбу қадимий номалардаги ҳикматларни бутун борлигимга сингдириб олдим. Биринчи номадаги йўриқнома сирларини ўрганиб бўлгач,

бошқаларга ҳам ўта бошладим, бора-бора бу тамойиллар наинки менинг кун тартибимга, балки ҳаётимнинг бир қисмига айланди. Бир оз вақт ўтиб, мезбон менга ушбу ўнта нома солинган сандиқчани ва эллик тилла солинган ҳамённи муҳрланган мактуб билан қўшиб топширди. Мени кузатишаётганда, бу мактубни фақат ўз уйимда, бу ердан узоқлашганимда ўқишим лозимлиги уқтирилди. Мен бу оила аъзолари билан қуюқ хайрлашгач, омадимни излаб сафарга отландим. Ваъдага биноан Тадморга олиб борадиган йўлга тушганимдан кейингина мактубни очиб ўқидим. Хатда бу пулларимни ўз эҳтиёжларимга қараб сарфлашим, ҳар бир ишни қилишдан аввал номалардаги кўрсатмаларга амал қилишим лозимлиги ёзилганди.

Шунингдек, мактубда топган-тутганимнинг ярми-ни фақирларга ва омадсиз одамларга улашишим айтилганди. Фақат терида битилган номаларни ҳеч кимга бермаслигим, ҳатто кўрсатмаслигим қаттиқ тайнинланган эди. Мен номалар солинган бу сандиқни муайян белгига эга бўлган одамгагина омонатга топширишим керак эди.

— Сизни тушунмаяпман, хожам, — деди Хафид ҳайрон елка қисиб.

— Шошма, мен ҳаммасини тушунтираман. Мен ўша шартли белгига эга одамни ҳар доим кутиб яшадим. Мен ҳамиша ўзлаштирган тамойилларим асосида давлатимни кўпайтириб бордим. Охир-оқибат мен кутган одам келмаслигига ишона бошладим. Агар сен Байт-Лахмга бормасанг, мен шу ишонч билан ўтиб кетардим. Сен ортингдан ёрқин юлдузни эргаштириб келган чоғингда, мен омонатни беришим керак бўлган одам сен эканингни тушуниб етдим. Очифини айтсан, бир оз муддат иккиланиб турдим, сен билан юз берган ҳодисанинг мөҳиятини тўла англолмадим. Энди эса, омонатнинг навбатдаги эгаси сен эканингга шубҳам йўқ. Мен ҳам маъбудлар иродасига қарши боролмайман. Айниқса, сен анави гўдакни ёпинчиқ билан йўргаклаганингда,

қандай воқеанинг иштирокчиси бўлганингни тушундим ва менинг ҳақиқий ворисим эканингга ишондим. Энди бу хазинани сенга топшираман. Қизиқ, мен бу ҳақиқатни англаган чоғимда, ҳаётай куч-кувватим мени тарк эта-ётганини ҳис этдим. Менинг куним битган, аммо хотиржамман. Чунки, сени топдим.

Кекса Патроснинг овози пасайиб бораарди. У ожизгина муштини қисиб, бор кучини тўплашга тиришиди:

— Ўғлим, мени диққат билан эшит ва эслаб қол. Чунки, айтган гапларимни такрорлаш учун менда куч қолмаган.

Хафид кўз ёшлари ёноқларини ювиб тушаётганини англади. Сал илгарилаб, кўлини кекса устозининг елка-сига кўйди. Патрос йўтала-йўтала гапида давом этди:

— Сенга жуда катта бойлик яширилган бу сандиқчани топшираман. Аммо, сен баъзи шартларни бажаришинг керак. Сандиқчада юз тилла солинган ҳамён ҳам бор. Бу пул сенга бир оз мол сотиб олиб, тижорат ишини бошлишингга етиб қолади. Мен сенга жуда катта бойлик қолдиришим мумкин эди. Аммо бу бойлик сенга фойда бермаслиги мумкин. Сен ўзинг баҳтингни топишинг, Ер юзидағи энг құдратли, буюк савдогар бўлишинг керак. Кўряпсанки, сенинг энг катта мақсадингни мен унутганим йўқ.

Патрос жуда қийналиб гапирад, бир оз жим туриб, куч тўплаб яна давом этарди:

— Ҳозироқ сафар тадоригини кўр, Дамашққа отлан! У ерда сен номаларда акс этган ҳикматларни ҳаётда қўллаб кўриш учун барча имкониятларга эга бўласан. Ўзингга мақбул ерда жойлашиб олганингдан кейин, биринчи номани очиб ўқи. Бу номада бошқаларида битилган кўрсатмаларни англаб етишинг учун керакли билимга эга бўласан. Сен бу битик маънисига тўла-тўқис етгунингча, уни қайта-қайта ўқи. Фақат биринчи номани тўла тушуниб етганингдан кейин, қолганларига ўтишинг мумкин. Сен шу номаларни ўқиб боришинг билан

ўз молларингни сота бошлайсан. Номалардан олган билимларингни шахсий тажрибангда қўллаб боришинг керак. Кўп ўтмай, сен қанча кўп номаларни ўқисанг, савдонг шу қадар юришиб кетишини тушунасан. Демак, менинг биринчи шартим — биринчи номада кўрсатилган қоидаларга тўла амал қиласман, деб қасам ич.

— Қасам ичаман, — деди Хафид.

— Яхши, жуда яхши, — деди Патрос. — Сен номаларнинг сирии<sup>1</sup> тўла англаб, дилингга жо қилиб бўлганингда, жуда бадавлат одамга айланасан. Ҳатто мендан ҳам бойиб кетишинг мумкин, — Хафиднинг ҳайратомуз нигоҳини кўриб, Патрос қўшиб қўйди. — Ҳа, ҳа, сен қандай катта хазиналарга эга бўлишингни ҳатто тасаввур ҳам қилолмайсан. Энди иккинчи шартимни эшит. Топган тутганингнинг ярмини муҳтож кишиларга тортиқ эт. Сен ҳеч қачон факир ва бева-бечоралардан ўз ёрдамингни аямасликка қасам ич.

— Қасам ичаман, хожам!

— Энди эса асосий шартимга ўтаман. Сен номалардан ўргангандаринг ҳақида ҳеч кимга оғиз очмаслигинг керак. Сен ҳам кун келиб, менга ўхшаб, худди сенинг йўлингни ёритиб келган юлдуз сингари шартли белгига дуч келасан. Сен билан ғорда содир бўлган воқеа эса менинг ҳамма шубҳаларимни тарқатиб юборди. Сенга ҳам ўз қисматидан, вазифасидан бехабар бўлган одам ана шундай шартли белгини олиб келади. Сен уни диққат билан кузатасан ва унга йўл берасан. Шундай одамни сенга юрагинг кўрсатади. Сен ўз қароринг тўғрилигига амин бўлганингдан кейин, худди мен каби, ўша шартли белгини кўрсатган одам эркак бўладими, аёлми, ушбу сандиқча ва унинг ичидагиларни беришинг керак. Бу омонатни унга топшириш чоғида унга ҳам мана шу шартларни эслатасан. Менга бир неча йил аввал топширилган номада айтилишича, бу сандиқчани қабул қилиб олган учинчи одам агар ўзи истаса, унда

күрсатилган сирларни бутун жаҳонга ошкор қилиши мумкин. Сен бу топширикларни бажара оласанми?

– Ваъда бераман, хожам!

Патрос худди елкасидан тоғ қулагандек, енгил тин олди. Заифгина кулимсираб, Хафиднинг юзини  силади.


– Ҳозироқ, сандиқни ол-да, жўна! Менинг эзгу тилакларим сенга ҳамиша йўлдош бўлсин, ишонаманки, сенинг маҳбубант Лиша албатта сен билан ўз қисматини бўлишишга рози бўлади.

Хафид йиғлаб юборди, аммо кўз ёш тўkkанидан уялди. Эгилиб сандиқчани олди-да, эшик томон юрди. Остонага етганида, тўхтаб ортига ўгирилди. Хожаси Хафиднинг ортидан термилиб турарди.

– Агар мен ўз қароримда қатъий турсам, ҳеч қандай тўсиқ мени тўхтата олмайдими? – сўради Хафид.

Кекса Патрос аранг кулимсираб, бош иргади.

Кейин эса Хафид билан видолашмоқ учун оғирлашиб қолган қоқсуяк қўлларини кўтариб, зўрға силкиди.





## ОРЗУЛАР САРИ ИЛК ҚАДАМИ

Хафид хачирда баланд ва мустаҳкам деворлар билан ўралган Дамашқнинг Шарқий дарвозаси орқали кириб, марказий кўчадан кета бошлади. Йигитчанинг қалби ҳаяжон ва шубҳалар ичида титрар, улкан савдо шаҳрининг талотўплари уни ваҳимага соларди. Унинг қаршиисида икки йўл турарди: ё кўриқчилар ҳамроҳлигида катта карвон билан савдо қилиш ёки Патроснинг маслаҳатларига кўра, яккаю ёлғиз савдо билан шуғулланиш. Савдогарлар бозорни бошларига кўтариб, харидорларни чорлар, ўз молларини оғиз кўпиртириб мақташарди. Айrim кўча олибсотарлари эса, ўз матоҳини сотмоқчи бўлиб, Хафиднинг бурнига тиқишириар, бу эса тўр йигитчани баттар кўрқитарди.

У мана шундай қатъий ва шафқатсиз шароитга мослаша олармикин? Хафид шилқим сотувчилардан бирининг молини нари итариб, Дамашқ бозори жойлашган катта майдонга чиқиб олди. Ўнгу сўлда бозор расталари қатор тизилиб ётарди. Олтин ва кумуш тақинчоқларнинг ялтирилтиридан кўз қамашарди. Хафид кўнчилар, тиқувчилар, гиламфуруш ва атторларнинг расталаридан бирма-бир ўтибборарди. Хачир билан ҳар қадам масофани босиб ўтиш унга қийинчилик туғдирав, айrim ҳолларда дўконлар олдида тўпланган оломон орасида тиқилиб қоларди. Ҳамма томондан ёпирилган савдогарлар Хафиднинг енгидан тортиб, ўз дўконларидаги молларни сотиб олишга ундашарди. Гоҳида савдогарларнинг ҳайқиригини тиланчиларнинг мунгли нолалари босиб кетарди.

Хафид беихтиёр олисдан күзга ташланиб турган Эрмон тоғи чўққилариға тикилди: ҳозир ёз чилласи бўлишига қарамай, тоғ чўққилари оппоқ қор билан қопланган эди. Пурвиқор тоғ унинг оёқлари остида ўрмалаб юрган майда одамларга улуғвор назар ташлаб турганга ўхшаб кўринарди. Хафид яна бир оз юриб, марказий кўчадан чапга бурилиб, ўткинчилардан ижара учун жой сўрай бошлади. Сўраб-суриштириб, шинамгина карvonсаройни топиб борди. Карvonсарой соҳиби Антоний Хафиддан бир ойлик ижара пулинни олдиндан олиб, энг яхши хужралардан бирига жойлаштириди-да, хачирни отхона тарафга етаклаб кетди.

У хужрага қамалиб оларкан, заранг сандиқчани олиб, унинг белидаги тасмаларни ечди. Сандиқчанинг қопқоғи осонгина очилди. Мана, ўша сехрли номалар. Хафид уларга қўл узатаркан, сапчиб тушди. Чарм ўрамлар худди тирик жонзотдек ўзидан иссиқлик таратиб турарди. У дарҳол қўлини тортиб олди ва хужранинг ташқаридан панжараланган деразаси томон юрди. Гарчи карvonсарой бозордан анча олисда жойлашган бўлса-да, кўчадан савдогарларнинг бақир-чақири эшитилиб турарди.

Яна Хафиднинг юрагини таниш қўркув ва ҳаяжон қоплади, ич-ичидан тижорат йўлини танлагани учун пушаймонликни туйди. У ўз кучига ортиқча баҳо бериб юбормадимикин? Ниҳоят бу мубҳам ўйлар уни маҳв этди, бу қийноқларга бошқа бардоши етмаслигини билib, деворга беҳол суюнди. Шу топда унинг қалбидан бир нидо отилиб чиқди:

— Мен қанчалар аҳмоқман! Ўзимча савдогар бўлмоқчи бўлдим. Ахир оддий туякаш қаерда-ю, савдогарлик қаерда? Менда на тажриба, на журъат бўлмаса. Ҳатто савдо расталарини оралашга ҳам қўрқаман. Мен бугун юзлаб савдогарларни кўрдим. Уларнинг ҳар бири савдо, олди-сотди бобида мени ярим йўлда қолдиришади. Мен улар билан тенг бўла олармидим? Эҳтимол, менда хоҳиш,

ғайрат, интилиш бордир? Аммо, буларнинг ўзи савдогар бўлиш учун етарли бўлармиди? Ахир Дамашқдаги ҳамма савдогарларда бу хислатлар ошиб-тошиб ётибди. Йўқ, мен бундай номутаносиб курашда енгигб чиқолмайман. Фақат ўта аҳмоқ ёки ўзига ҳаддан ортиқ ишонган одам бу ерда нон топиб кета оламан деб ўйлаши мумкин. Патрос, қадрдоним Патрос, мен яна сизнинг ишончингизни оқлай олмайдиганга ўхшайман.

Хафид ўзини гилам устига ташлаб, узоқ йиғлади, кейин эса тинчиб ухлаб қолди.

У кўзини очганида аллақачон тонг отганди. Илкис қулогига кушларнинг чирқиллаган товуши эшишилди. У ўрнидан туриб, кўзларига ишонмади. Деразадан ҳужрага қалдирғоч учиб кирган, сандиқчанинг очик қопқоғи устида қўниб олганча, ўз тилида бир нималар деб чулдиради. Хафид дераза олдига югуриб борди. Кўча четида, дераза ёнида ўсган дарахт шохларига юзлаб қалдирғочлар қўниб олган, вижирлаганча янги кунни кутлашарди. Хафид уларга қараб кулимсираб қўйди. Мана, улардан бири дераза олдига учиб келди, аммо Хафиддан қўрқиб яна ортига қайтди. Йигитча ортига ўгирилиб, яна хона ўртасида турган сандиқча устида ўтирган, чақирилмаган меҳмонга қаради. Кушча ҳамон кичкина бошчасини эгиб ўтиради.

Хафид сандиқчага яқинлашиб, қўлини чўзди. Кушча дадиллик билан унинг кафтига қўнди.

– Қара-я! Юзлаб қушлар дарахтда ўтиришибди, ҳатто деразага яқинлашишга ҳам қўрқишаётди. Фақат сен кўрқмасдан менинг ҳужрамга кира олдинг.

Кушча Хафиднинг кафтини чўқиб, оғритиб юборди. Хонтахта устидаги тугунчада нон ва озроқ пишлок бор эди. Хафид тугунчани очиб, унинг ичидаги ноннинг бир бўлagini майдалади. Кейин пишлоқнинг ҳам бир қисмини майда увокларга ажратди. Кушча унинг


кафтидан пиrr этиб учиb, хонтахта устига қүнди ва ушоқларни чўқишига тушди.

Хафид ўйчанлик билан яна дераза олдига борди ва панжараларни пайпаслади. Панжаранинг тирқишилари жуда кичкина ва тор эди. Қизик, қалдирғоч бу ердан қандай учиб кирдийкин? Шу онда унинг қулоги остида Патроснинг сокин овози янграгандек бўлди:

– Агар қароринг қатъий бўлса, бирор бир тўсиқ йўлингда гов бўлолмайди.

Хафид яна ортига қайрилиб, сандиқча ичидаги номаларни қўлига олди. Номалардан бири бошқаларига қараганда анча уриниб қолганди. Хафид айнан ўша ўрамни очди. У ўтириб олди-да, ўқишига тутинди. Айни дамда унда қўркувдан асар ҳам қолмаганди. Хафид номадан нигоҳларини узиб, хонтахтага қараганда, қалдирғоч аллақачон учиб кетганди.

Фақатгина хонтахта устида сочилган нон ва пишлок қолдиқлари кичкина довюрак қушчанинг ғаройиб ташрифидан дарак берарди. Хафид яна нигоҳини номага қаратди ва илк қаторни ўқиди: “Биринчи нома”. У бутун вужуди билан мутолаага шўнгиди.





## БИРИНЧИ НОМА

### *Мен бугун янги ҳаёт бошлайман*

Бугун мен турли жароҳатлар, яра-чақалар билан тўлиб тошган эски теримдан воз кечаман. Бугун мен янгидан туғилдим. Мен туғилган жой худди ҳар ким ўзи истаган мевани уза оладиган боғга ўхшайди. Бугун ўзим танлаган касбнинг оқилу донолари томонидан экилган, насллардан наслларга ўтиб келаётган энг баланд ва энг гўзал донишмандлик дарахтининг мевасини узиб оламан. Бугун мен ана шу ҳаётбахш мевани истеъмол қиласман, унинг вужудимга инган уруғидан баҳт ва толе униб чиқади, қаршимда янги ҳаётнинг дарвозаси очилади. Мен танлаган йўл ёқалаб имкон атиргуллари очилиб ётибди. Аммо, бу гулларнинг шоҳлари пушаймонлик ва изтироб тиканларига тўлиб тошган. Бу гулларнинг тагида мақсадига ета олмаган қанчадан қанча йўловчиларнинг хазон бўлган умидлари сочилиб ётибди.

Мен юрмоқчи бўлган бу йўлдан кимлар ўтмаган, бу йўлда мағлубиятга учраганларнинг ҳам сон-саноғи йўқ. Лекин, мен бу йўлда ғолиб чиққанлар қаторидан жой олишимга ишонаман. Чунки менинг қўлимда ҳамиша олдинга бошловчи бебаҳо ҳикмат турибди. Мен унинг ёрдамида ҳамма тўсикларни енгигб ўтаман, бепоён денгиз ва уммонлардан сузиг, мен учун олис орзу бўлиб туюлган муваффақият соҳилига етаман. Менинг барча ҳаракатларим мағлубият эмас, ғалаба олиб келади. Шу ондан эътиборан, табиатнинг ўзи мен ҳақимда қайғуради, вужудим оғриқларни, руҳим ғам-андухни писанд қилмайди. Омадсизлик ҳам худди оғриқ каби мени четлаб ўтади. Мен уларни ўтган ҳаётимда бошдан кечириб

бўлганман. Мен энди уларни инкор этаман. Мен энди зулматдан бойлик ва фаровонлик зиёси билан ёришган кенгликларга олиб чиқувчи ҳикмат ва насиҳатларни қабул қилишга тайёрман. Мен ҳали шундай буюкликка эришаманки, Геспериднинг олтин олма ўсадиган боғлари ҳам менинг қаршимда ўз ҳашаматини йўқотади.

Вақт—инсон учун энг яхши мураббий. Менга инсоний донишмандликнинг барча ҳикмати аён бўлиши мумкин, аммо мен абадий яшамайман. Мен қанча яшашибдан қатъи назар, сабр қилиш санъатини ўрганишим керак, зотан, табиат шошқалоқликни ёқтирумайди. Зайтун ниҳоли дараҳтга айлангунича юз йил керак бўлади. Бир бош пиёз эса, тўққиз ҳафтада қартаяди. Менинг ҳаётим ҳам пиёзга ўхшайди. Лекин мен бу ҳаётдан қониқмайман. Мен шу ондан зайтун дараҳтига — энг буюк савдо гарга айланаман.

Аммо, бунга қандай эришаман? Ахир буюк бўлиш учун менда на билим, на тажриба бўлмаса... Мен кўпинча ўзимга ўзим ачинаётганимни ҳис қиласман. Жавоб жуда оддий. Мен бу йўлга қадам кўярканман, миям кераксиз билимларнинг юқидан зирқирамайди, елкамни ҳеч кимга керак бўлмаган, мантиқсиз тажриба юки босмайди. Мени табиат ҳар қандай чангальзор жонивори ҳавас қила оладиган билим ва фаросат билан тақдирлаган, тажриба эса ўз-ўзидан келаверади. Ҳа, одатда, тажрибага гоҳида юқори баҳо берилади.

Тажриба жуда кўп нарсани ўргатади, у жуда кўп йилларни ямламай ютгани боис, унинг сабоқлари юксак қийматларга муносиб. Йўқотилган йилларнинг баҳоси қиммат туради. Сен бу йўлдан бориб, кўп нарсани ўрганасан, аммо у пайтда ёшинг бир жойга бориб қолади. Қолаверса, тажриба худди урфга, одатга ўхшайди. Ке-ча қойилмақом туюлган нарса бугун талабга жавоб бермай қолади. Фақат менинг қўлимдаги қонунлар ва тамойилларгина абадий яшайди. Бу номаларда битилган

ҳақиқатлар мени буюклик сари бошлайды. Улар мени мағлубиятдан қочиб, ғалаба қозонишга ундаиди. Мұваффақият эса, қалбнинг ҳолатидир. Мингта донишманнан “омад нима?” деб сүрасанг, уларнинг ҳар бири айрича жавоб қайтаради. Аммо, улардан омадсизлик нима, деб сүрасанг, ҳаммаси бир хил жавоб беради: “Омадсизлик — бу катта ё кичик бўлишидан қатъи назар ҳаётий мақсадларга ета олиш қобилиятига эга бўлмаслиқдир”. Омадли ва омадсиз одамнинг ўртасида биргина фарқ бор. Уларнинг одатлари турлича. Яхши одатлар — муваффақиятга, ёмонлари эса омадсизликка, келажакнинг ёпиқ эшиклари сари бошлайди. Демак, мен амал қилишим керак бўлган энг асосий ва энг биринчи қоида — мен ўзим учун энг яхши одатларни ўйлаб топаман ва уларнинг қулига айланаман. Болалигимда мен ўз истакларимга тобе эдим. Энди эса ҳамма эркаклар қатори ўз одатларимга боғланиб қолганман. Менинг ўтган умрим келажагимга таҳдид солмаслиги учун энди ана шу одатларимни тартибга солишим лозим. Менинг харакатларимни қизғанчиқлик, эҳтирослар, хавотир, шубҳа-гумонлар, худбинлик, қўрқув, муҳаббат сингари туйгулар ва бошқа турли бўлмагур одатлар бошқармоқда, улар менинг устимдан ҳукмронлик қилишмоқда.

Лекин улар орасидан энг ёмон хусусиятларим ва одатларимдан тезликда воз кечишим, агар кимгадир тобе бўлишим керак бўлса, фақат ижобий сифатларимга бўйсунишим лозим. Ёмон одатлардан қатъий воз кечаман. Яхшилик уруғи мўл ҳосил бериши учун уни ҳосилдор ерга қадамоқ лозим. Демак, мен ижобий одатларимнинг қулига айланаман.


Бу мушкул вазифани қандай адо этаман? Бу ишда менга ушбу номалар ёрдам беради: чунки уларнинг ҳар бирида мени ёмон одатлардан халос этиб, вужудимни улардан поклаб, ўрнига мени омад сари янада яқинлаштирадиган эзгу ҳисларни жо эта олувчи

қоидалар битилган. Табиат қонунларига кўра, эски одатлардан янгиларини жорий этиш ҳисобига воз кечиши мумкин. Шу боис, ушбу номадаги ҳикматлар ҳаётда ўз самарасини бериши учун мен ўзимнинг янги одатимни шакллантиришга киришаман. Хўш, қандай қилиб? Ҳар бир номани мен ўттиз кун давомида қайта-қайта ўқийман ва шундан кейингина навбатдаги номани очаман. Энг аввало, мана шу номалардаги ҳар бир сўзни уйғонишим билан ичимда ўқиб чиқаман. Тушдан кейин яна бир бор тақрорлайман. Уйкуга кетишдан аввал ҳам, фақат бу гал овоз чиқариб ўқийман. Эртаси куни ҳам уларни шу тахлит ўқиб чиқаман ва бу ҳолат ўттиз кун тақрорланади. Бу давр мобайнида номалар мен учун кундалик мутолаа қуроли бўлади ва бу ишни ўзим учун илк ижобий кўникмага айлантираман. Хўш, мен уларни ўқиши орқали нимага эришаман? Бу одат инсон эришиши мумкин бўлган ҳамма нарсалар сирини ўзида мужассам этади. Мен номадаги сўзларни қайтаравериб, уларни тафаккуримнинг ажралмас қисмига айлантираман, улар менинг қон-қонимга сингиб кетади. Хушёрлик пайтимда ҳам, уйкуда ҳам улар мени тарк этишмайди, ҳар қандай вазиятда менга ақлли хулосалар чиқариб, тўғри ҳаракат қилишни ўргатади. Номалар менинг сирли, иккиламчи тафаккуримдан жой олганда, мен шу чоққача ўзимга маълум бўлмаган янги қувват вужудимга оқиб кирганини ҳис этиб, уйкудан уйғона бошлайман. Мен ўзига ишонган, кучли, иродали инсонга айланаман. Кўркувдан халос бўламан ва атрофдагиларга нисбатан хавотирим йўқолади. Дунё мен ўйлаганчалик хатарли эмаслигига ишонишим билан ўзимни янада баҳтлироқ ҳис этаман. Юрагимда ғам-ташвиш, андуҳ учун ўрин қолмайди. Натижада ўзимга бўлган ишонч мени олдинга бошлайди, мени таъқиб қилаётган машақатларни енга оламан. Мен номаларда қандай кўрсатилган бўлса, шу тахлит ҳаракат қиламан ва бу ҳаракатлар кундалик ҳаёт тарзимга

айланади. Мана, мен яна бир одатни ўзлаштиридим ва бу одатдан ҳеч қачон воз кечмайман. Бироқ у менга халал бермайди, аксинча хуш кайфият бағишлайди. Шу тариқа менинг ҳаётим қувонч ва шодликка тўлади. Ва энг муҳими шундаки — тез-тез қайтарилиган ҳаракат одатга айланса, мен бу одатнинг кули бўлсанам, аммо бу эзгу одат бўлса, демакки, бу менинг хоҳиш-иродам демакдир.

### *Демак, мен бугун янги ҳаёт бошлайман!*

Мен ўзимга ўзим тантанали ваъда бераманки, мени бу ривожланиш йўлидан ҳеч нарса қайтара олмайди. Мен бир кунимни ҳам бекорга йўқотмайман, аммо бу ҳикматли номаларни қайта-қайта ўқийман. Зоро, йўқотилган кунни ортга қайтариб бўлмайди. Вақт тез окувчи дарёга ўхшайди. Мен бу номаларни ҳар куни ўқишни канда қилмайман, чунки мутолаа учун кетадиган бир неча дақиқа мен эришишим мумкин бўлган баҳт ва муваффақиятга арзиди. Мен амал қилишим лозим бўлган бу сўзларни қайта-қайта ўқир эканман, улар қанчалик содда туюлмасин, чуқур мантиғига шубҳа қилмайман. Улар энг муҳим ва вожиб нарсалар ҳақида сўзлайди. Шароб тайёрловчи минглаб узум доналарини янчиб, пўстлоқ ва уруғларини ажратиб, күшларга бераркан, ўзи учун бир кўза шаробни олиб қолади. Менинг қаршимда асрлар давомида қиёмига етган ҳикмат шароби турибди. Кўп нарсалар йўқолиб кетди, шамолга совурилди. Номалардаги сўзларда эса, рад этиб бўлмас ҳақиқат сақланиб қолди. Мен бу ҳикмат шаробининг бир томчисини ҳам қолдирмай ичаман ва у билан биргага вужудимга омад уруғлари ҳам оқиб киради. Бугун менинг эски терим чанг-тўзонга айланади. Мен бошимни баланд кўтариб, олға бораман. Одамлар ҳам мени танимай қоли shadedi. Чунки мен энди бошқа одамман. Мен иккинчи ҳаётимни бошладим.



БОБ

## ИККИНЧИ НОМА

*Мен бу кунни муҳаббат тўла қалбим билан қарши оламан!*

Энди мен буюк сирни — ўй-хаёллардаги ҳар қандай орзуни рўёбга чиқара олишни биламан. Менинг мускулларим худди пўлат сингари мустаҳкам. Агар истасам, қалқонни ҳам теша оламан. Мен ўз ҳаётимни ўзгартира оламан. Лекин инсонлар қалбини кашф эта-диган ягона куч — бу муҳаббат. Мен ана шу санъатни мукаммал ўзлаштира олмас эканман, бозордаги ҳаммол даражасидан юксала олмайман. Муҳаббатни энг қудратли қуролга айлантираман, шунда мен юзланган бирор инсон менга қарши тура олмайди. Даилилларимга улар ўзларича жавоб беришлари, менинг қарашларимга ишонмасликлари мумкин. Майли менинг ҳақиқатларимни улар киноя билан қарши олишсин, майли менинг ташқи кўринишим уларга ёқмасин. Ҳатто менинг муросасозлигимни улар нотўғри тушунишар. Яъни, мен нима демай, нима қилмай, уларда шубҳа уйғотарман. Фақат менинг қайноқ муҳаббатим ҳар қандай музни ҳам эритишга қодир бўлган қуёш нурлари сингари уларнинг қалбига илиқлик олиб киради.

*Демак, мен бугун янги ҳаёт бошлайман!*

Бу муҳаббатга қандай эришиш мумкин? Жуда оддий. Ҳозирдан бошлаб, мен худди янги туғилгандай, атрофимдаги ҳамма нарсага, ҳайрат ва муҳаббат билан боқаман. Мени ҳарорати билан иситгани учун Күёшни

яна бошқатдан севаман. Менинг қалбимдаги ғамларни ва түшкүн ҳисларимни ювіб кетаётгани учун ёмғирга ҳам ўз севгимни тортиқ этаман. Йўлимни ёриттгани учун — мен нурни севаман. Ўз бағрида юлдузларни яширгани учун — қоронғиликни севаман. Мен баҳтни шодон қарши оламан — чунки у ҳаётимни янада гўзаллаштиради. Мен қайғудан ҳам ранжимайман, чунки у ўз ботинимни чуқурроқ англашимга кўмаклашади. Ҳар бир мукофотни керагидек қарши оламан, ҳар бир қаршиликни ҳам тақдирнинг даъвати сифатида қабул қиласман. Биринчисини қувонч билан кутиб оламан, кейингисини енгиб ўтаман. Нимаики қилмай, ҳаммасига севинч ва муҳаббат билан ёндашаман.

**Мен бу кунни муҳаббат тўла қалбим билан қарши оламан!**

Ҳатто нутқимни ҳам ўзгартираман. Мен ғанимларимни мақтайман — улар менинг дўстларимга айланишади. Дўстларимни улуғлайман — улар менинг туғишганларимга айланишади. Ҳар доим ва ҳамма учун мақташга асос қидираман. Ҳеч қачон бирорни ғийбат қилиш даражасида тубанликка тушмайман. Ким ҳақдадир ёмон гап айтишдан тилимни тишлайман. Кимнидир мақташ керак бўлса, бу ишни бор овозим билан, сидқидилдан адо этаман. Қушлар, денгиз, шамол, бутун борлиқ Яратганга шукронасини бор овози билан изҳор этади-ку? Уларнинг мусиқасини эшлитиб, қалбларимиз шодланади. Мен ҳам шундай гапираманки, сўзларим худди одамларнинг қулоғига мусиқадек оқиб киради. Бугундан бошлаб, мен бу сирни ёдимда сақлаб қоламан ва у ҳаётимни ўзгартиради.

**Мен бу кунни муҳаббат тўла қалбим билан қарши оламан!**

Мен қандай ҳаракат қиласам? Мен одамларнинг хатти-ҳаракатларидан қатъи назар уларни яхши кўраман. Чунки ҳар бир инсоннинг яхши жиҳатлари бўлади, фақат уларни қидириб топиш керак. Диққат қилсам, ана шу жиҳатларни топа оламан. Мен муҳаббат билан одамларнинг юракларидаги шубҳа ва нафратни парчалаб ташлайман. Уларнинг қалбларига қўприк соламан ва бу қалбларни муҳаббат билан тўлдираман. Мен ўзимнинг тақаббурона ҳаракатларимни ҳам яхши кўраман, чунки улар менга илҳом бағишлияпти. Мен ўз омадсизликларимни яхши кўраман, улар менга сабоқ беришяпти. Мен ўз хукмдоримни севаман. У менинг бошим узра соябон. Мен факирлар ва беморларни яхши кўраман. Зотан уларга қисмат шуни раво кўрган. Мен бойларни севаман, чунки уларнинг аксарияти ёлғиз. Мен қашшоқларни севаман. Чунки улар бу оламда ҳад-хисобсиз. Мен ёшларни уларнинг имони ва ишончи учун севаман, кексаларни донолиги ва идроки учун яхши кўраман. Мен гўзалларни ғамгин кўзлари сабабли севаман, мен хунукларни сокин қалблари учун учун севаман.

*Мен бу кунни муҳаббат тўла қалбим билан қарши оламан!*

Лекин бошқаларнинг менга муносабатига қандай жавоб қайтараман? Албатта муҳаббат билан. Муҳаббат бу қалбларга йўл очадиган қуролгина эмас, балки юрагими ни нафрат ўқлари ва адоват пайконларидан асрайдиган мустаҳкам қалқондир. Мен гумонлар ва нохушликларни ана шу гўзal қалқоним билан даф қиласам. Бу қалқон мени савдо жараёнида ҳимоя қиласди, ёлғизлик онларида кўллаб-куватлайди. Оғир мусибат дамларида у мени овутади ва таскин беради. Шу тариқа у борган сари

мустаҳкамланиб, кучайиб бораверади. Кунларнинг бирда мен усиз қўрқмасдан одамларнинг қаршиисига чиқа оламан. Аммо, бу пайтда мен ҳаёт эҳромининг энг баланд қисмида бўламан.

***Мен бу кунни муҳаббат тўла қалбим билан қарши оламан!***


Мен одамлар билан қандай муроқот қиласман? Бунинг биргина йўли бор — кимгадир қараб туриб, ичимда шу сўзларни айтаман: “Мен сени яхши қўраман!”. Тилга кўчмаган бу сўзлар, менинг кўзларимда ва юзимдаги табассумимда акс этади. Менинг бу муносабатим қаршимдаги одамга ҳам кўчиб ўтади. Ана шу дамда мен муҳаббат билан таклиф этаётган молни қайси харидор рад эта оларкин?


Аммо, мен ҳаммадан кўра кўпроқ ўзимни севишим керак. Бу муҳаббат мени қалбимга, онгимга, қучогимга интилаётган ҳамма нарсага ўта сергак ва теран боқишга ундейди. Мен ўзимга тегишли ҳамма нарсага эътиборли бўламан. Вужудимни ва руҳимни покиза сақлайман. Менинг кўзларим ҳеч кимга бефарқ боқмайди, ҳеч қачон тушкунликка тушмайман. Атрофимдаги ҳамма нарсага мен ўзлаштирган асрий ҳикматлар нигоҳи билан қарайман. Ҳеч қачон ўз қалбим ва руҳимнинг шафқатсиз, ҳиссиз бўлишига имкон бермайман. Тафаккур ва эътиқод менинг асосий тамойилим бўлади. На алам, на худбинлик қалбим ва руҳимни ёриб кира олмайди. Юрагим бегоналарнинг кечинмаларига бефарқ бўлганидан кўра тарс ёрилиб кетгани афзал.

***Мен бу кунни муҳаббат тўла қалбим билан қарши оламан!***

Ҳозирдан эътиборан мен ҳамма одамларни яхши кўраман. Нафрат мени буткул тарк этади ва менинг бутун борлиғимни муҳаббат эгаллайди. Кимдандир ғазбланишга, асабийлашишга вақтим бўлмайди, бор вақтимни муҳаббатга баҳш этаман. Бугун мен одамлар орасидаги одамга айланиш учун илк қадамимни ташлайман. Муҳаббат менинг даромадларимни юзлаб, минглаб маротаба кўпайтиради ва мен ер юзидағи энг буюк савдогарга айланаман. Менинг одамларга меҳр кўрсатишдан бошқа хислатим йўқ ва мен бундан унумли фойдаланаман. Муҳаббатсиз менинг ҳамма бошлаган ишларим қасодга учрайди. Менинг барча режаларим, ҳатто улар шуҳратпарастликка хизмат қиласа-да, муҳаббат асосига курилган. Муҳаббат энг буюк билим ва хунар демакдир. Бу хунарнинг эгаси ҳар қандай мақсадига эришади.

*Мен бу кунни муҳаббат тўла қалбим билан қарши оламан ва у менга омад олиб келади!*





## УЧИНЧИ НОМА

*Мен муваффақиятга эришиши йўлида қатъиятли бўламан!*

Мен бу оламга синовларни енгиш учун келганман. Менинг томиримда мағлубларнинг эмас, фақат ғолибларнинг қони оқмоқда. Мен чўпоннинг таёғи келиб тушишини сабр билан кутадиган қўй эмасман. Мен шерман! Мен қўйлар подасида юришдан воз кечаман. Мен уларнинг шикоятомуз маърашини эшитишни истамайман. Омадсизлик — юкумли касаллик. Қўйларнинг ўрни подада, борар жойи эса, кушхона. Менинг қисматим бўлак.

*Мен муваффақиятга эришиши йўлида қатъиятли бўламан!*

Тақдирнинг тухфалари саёҳатнинг бошида эмас, охирида бўлади. Мен ўз мақсадларимга етишиш учун қанча йўл босишимни билмайман. Мен ҳар доим, ҳатто ҳар қадамда омадсизлик билан тўқнаш келишим мумкин. Бироқ, омад олдинда, исталган муюлишда кутиб турган бўлади. Агар мен омадсизликни енгиш ва ўша муюлишга етиб олиш учун ўзимда куч топа олмасам, ҳеч қачон мақсадимга етиша олмайман. Ҳеч нарса мени иккинчи қадамни босишимдан қайтара олмайди. Агар у ҳам менга омад олиб келмаса, учинчи қадамни қўяман. Ҳеч ким мени тўхтатолмайди. Мен олға юришдан қийналмайман.

## *Мен мұваффақиятга әришии үйлида қатыяятын бұламан!*

Хозирдан бошлаб, мен ўзимни худди ўтин ёрувчидек ҳис этаман. Менинг омад сари қўйган ҳар бир қадамим бу болтамнинг мустаҳкам эман тўнкасига тушган бир зарбасидир. Биринчи зарба кундадан кичик бир заррани қўпориб чиқаради, иккинчи ва учинчи зарбалар ҳам камроқ самара бериши мумкин. Бироқ, минглаб зарбалар натижасида бу кунда майдаланиб кетиши муқаррар. Мен зарба беришни бугундан бошлайман.

Мен худди тоғларни вайрон қилишга қодир ёмғир томчисига, шерни еб битира оладиган чумолига, ерни ёрита оладиган юлдузга, эхром бунёд этишга қодир қулга ўхшайман. Ғишт ортидан ғишт, тош ортидан тош қўйиб, ўз қасримни тиклайман. Сарфланган куч ва уринишлар қанчалик кўп бўлса, сон ҳамда сифатга таъсир қиласи, пировардида мен ғолибга айланаман.

## *Мен мұваффақиятга әришии үйлида қатыяятын бұламан!*

Мен ҳеч қачон мағлубият ҳакида ўйламайман. Ўз нутқимдан “енгиламан”, “эплолмайман”, “қўлимдан келмайди”, “мумкин эмас”, “ишониш қийин”, “кучим етмайди”, “омадсизлик”, “фойдасиз”, “умид йўқ”, “чекинаман” сингари сўзларни чиқариб ташлайман. Майли бу сўзларни омадсизлар қўллайверсин. Мен тушкунликка ҳам тушмайман. Шу иллат менга илакишиб қолган тақдирда, тушкун кайфиятда ҳам ишлашни давом эттираман. Меҳнат қиласи ва ҳар қандай синовга дош бераман. Мен энди олдимда турган тўсиқлар ҳакида эмас, балки ярқираб кўзни олаётган мақсадлар ҳакида ўйлайман. Мен сахрода дайдиб юрган бир йўловчиман: бу сахронинг ортида эса ҳамиша баҳор боғ-роғлар, гулу

гулзорлар, шарқироқ дарёларга тўла мамлакат ястаниб ётибди.

*Мен муваффақиятга эришии йўлида қатъиятли бўламан!*

Мен ҳамиша рақамларнинг қадимий қонунини ёдда тутаман ва уни ўз ҳаётимда татбиқ этаман. Савдо жа-раёнида тўпланган ҳар бир кўникма мени омад сари етаклашини доимо ёдда тутаман. Мен эшитган ҳар бир “йўқ” жавоби олдинда кутаётган “ҳа” жавобларига яқинлаштиради. Мен дуч келган ҳар бир норозилик мени шодон табассумлар сари бошлайди. Тун ҳамиша кунга ўз ўрнини бўшатади. Мен куннинг қадрига етишим учун тунни ҳис қилишим керак. Мен бир уринишда ва мутлақ муваффақиятга эришишим учун жуда кўп омадсизликларни енгиб ўтишим лозим.

*Мен муваффақиятга эришии йўлида қатъиятли бўламан!*

Мен ҳеч қачон тўхтаб қолмайман, аммо мунтазам изланиш ва интилишда бўламан. Мен тўсиқлардан ҳеч қачон қочмайман, улар йўлимда қанча кўп учраса, шунча яхши. Улар мени фақат тоблайди. Мен иродали бўламан, худди қутураётган уммонга ўз кемасини суреб бораётган денгизчи сингари ўз маҳоратимни такомиллаштириб бораман.

*Мен муваффақиятга эришии йўлида қатъиятли бўламан!*

Хозирдан танлаган касбим сирларини мендан яхшироқ биладиган одамлардан ўрганиб, уларни амалда кўллай бошлайман. Кун мен учун омадли ё омадсиз


келишидан қатъи назар кечгача яна бирор ишга улгуриб қолиш ҳақида ўйлайман. Агар кўнглимда бирор шубҳа пайдо бўлса, уларни нари қуваман ва яна интилавераман. Мен ғалабага яқинлашиш учун яна уриниб кўраман, агар бу гал ҳам кутилган натижага эришмасам, такрор ва такрор ҳаракат қилавераман. Куним омадсиз тугашига йўл қўймайман. Шундагина мен эртанги омад уруғини ўстира оламан ва омадсизлик олдида бошини эгиб қолган одамлардан олдинга ўтиб кетаман. Одамлар ноилож қўл қовуштириб турган жойда, мен курашни давом эттираман ва бу қайсарлигим мени мақсадга эриштиради.

*Мен муваффақиятга эришии йўлида қатъиятли бўламан!*

Аммо, кечаги омад ҳеч қачон мени қониқтирмаслиги керак. Чунки бу келгусидаги омадсизлик учун йўл очади. Мен ўтган кунги воқеаларини — хоҳ яхши, хоҳ ёмон бўлсин, унутаман. Ҳар бир янги кунни “бу менинг ҳаётимдаги энг яхши кун” деган ишонч билан қарши оламан.

Мен нафас олар эканман, ҳаракатдан тўхтамайман. Энди менга омаднинг энг муҳим қоидаларидан бири аён: қанчалик қатъиятли бўлсам, ғалаба ҳам шу қадар яқин бўлади.

*Мен қатъиятли бўламан ва албатта ғалабага эришаман!*



## ТҮРТИНЧИ НОМА

*Мен табиат яратган энг катта мүъжизаман!*

Ахир, дунё яралганидан бери ҳали айнан фикри, юраги, кўзлари, кулоқлари, қўллари, соchlари ва оғзи меники билан бир хил бўлган инсон туғилмаган, на яшаб ўтган, на тириклар, на кейин туғиладиганлар орасида мендек юрадиган, менга ўхшаб гапирадиган ва ўйлайдиган одам учрамайди. Ҳамма одамлар — менинг биродарларим, аммо мен ҳеч кимга ўхшамайман.

*Мен табиат яратган энг катта мүъжизаман!*

Мен ҳам жонзотлар оламига мансубман, аммо бошқа жонзотларнинг эҳтиёжлари билан чекланиб қолмайман. Менинг ичимда авлоддан авлодга ўтиб келаётган бир олов ёниб турибди. Унинг ҳарорати мени доим ҳаракатланишга ундейди. Менинг руҳим исёнкор. Нигоҳларим қатъий. Мен ҳозиргидан-да яхши бўлишим учун тинмай ҳаракат қиласман. Шубҳалар оташи ва муваққат омадсизлик кайфиятини енгиб, бутун оламга ҳеч кимга ўхшамаслигимни кўрсатаман. Ҳеч ким менинг болаларимни, ҳаракатларимни, фикрларимни, имзомни такрорлай олмайди ва ҳеч ким мендек савдо қилолмайди. Энди мен ўз бетакрорлигимни ўз фойдамга йўналтираман, у менинг энг гўзал хислатим бўлиб, ғолибликка етаклайди.

*Мен табиат яратган энг катта мүъжизаман!*

Мен бошқалар қилган ишни тақрорлашга уринмайман. Бунинг ўрнига, мен нафақат ўз молимни, балки беназирлигимни ҳам савдога қўяман. Ана шунда менинг савдом юришади. Мен ҳозирдан ўзимнинг ҳеч кимга ўхшамаган томонларимни кўпроқ намоён этишга, бошқаларга ўхшашиб жиҳатларимни яширишга уринаман. Мен сотаётган моллар ҳам фақатгина ўзимга хос жиҳатларимни кўрсатиши лозим. Ҳар бир савдогар ўз қиёфаси билан ғуурланиши керак. Бу унинг савдосида ҳам акс этади.

***Мен табиат яратган энг катта мўъжизаман!***

Мен — ноёб буюмман, аммо ҳар бир буюмнинг ўз қиймати бор. Фақат, менинг қийматим жуда баланд. Мен минг йиллик ривожланишининг сўнгги маҳсулиман, мен ўзимдан аввалги аждодларнинг онгу тафаккурини ўзимга сингдириб олганман. Агар мен ақлим, қалбим, вужудим ва қобилиятимдан унумли фойдала олмасам, уларни йўқقا чиқарган бўламан. Менинг имкониятларим чекланмаган. Мен ўз миям ва мускулларимнинг жуда оз қисмини ишлатяпман, холос. Энди мен ўз имкониятларимдан тўлалигича фойдаланаман ва мен бошлаган ҳамма ишлар омадли якун топади. Мен бу ишни эртага эмас, бугунок қиласман. Менинг эртанги куним ҳар қанча омадли бўлмасин, эришганларим билан қаноатланиб қолмайман ва ҳеч қачон ўзимни кўкка кўтариб мақтамайман. Менинг дастлабки ғалабаларим бу ҳеч гап эмас. Мен олға интиламан ва бундан-да кўпрогига эришаман. Мен ўйлаганларимнинг барига етаман. Акс ҳолда табиат мени бу қадар қийинчилик билан яратмаган бўларди. Мен табиатнинг мўъжизаларидан бири эканман, унинг кудратини ўз ишларимда кўрсатишим керак.

***Мен табиат яратган энг катта мўъжизаман!***

Мен бу оламга тасодифан келиб қолганим йўқ. Мен муайян мақсадлар учун яралганман. Мен қум зарраси эмас, тоғ бўлишим керак. Ҳозирдан мен ҳамма кучимни шу мақсад учун сафарбар этаман. Мен ўзимни аямасдан ишлайман.

Мен доимий равишда одамларни ҳам, ўзимни ҳам, сотаётган молларимни ҳам ўрганиб бораман ва шу тахлит ўз савдомни янада яхшилайман. Ўз маҳсулотимни сотар эканман, ҳар бир сўзимни ўйлаб, сайқаллаб, кейинтилимга кўчираман. Менинг нутқим — порлоқ истиқболимнинг пойдеворидир. Савдода зафар қозонишнинг асосий воситаси гапириш услуби эканини асло унутмайман. Кўплаб савдогарлар айнан тўғри ва ўринли гапира олиш санъати сабабли катта ютуқларга эришганлар. Ҳамиша ёдда тутишим керакки, менинг ишимда, гапириш усулим, қўл ҳаракатларим, гап оҳангим катта аҳамиятга эга, қанчалик чиройли ва самимий гапирсам, харидорни шу қадар тез ва осон жалб қиласман.

### **Мен табиат яратган энг катта мўъжизаман!**

Мен кераксиз нарсаларни хаёлимдан чиқариб, бутун эътиборимни бугун қилишим керак бўлган ишларга қаратаман. Уйдаги ташвишларнинг барини уйда қолдираман. Мен дўконимда савдо қиларканман, уй, оила ҳақида ўйламасликка ҳаракат қиласман. Акс ҳолда бу менга халал бериши мумкин. Уйга қайтгач, дўкондаги ишларимни, кўрган фойда ёки зараримни эсдан чиқараман. Ишдаги ҳеч бир нохушлик менинг уйга, оиласманга, болаларимга бўлган муҳаббатимга дахл қилолмайди, бироқ ютуқларим бу муҳаббатни ошириши мумкин. Мен ишда эканимда, юрагимда оилас учун жой бўлмайди, уйга қайтарканман, иш ҳақидаги бирор ўй-хаёлни ўзимга яқин олмайман. Аввал бошданоқ, мен оиласми ишдан ажратаман, бу эса ҳар иккисига бўлган муносабатимни мустаҳкамлайди. Иш уйдаги ташвишлардан холи бўлиши керак, акс ҳолда мен ҳеч

қачон юксала олмайман. Ҳаётнинг ўзгармас қонун-қоидаси шунаقا.

***Мен табиат яратган энг катта мўъжизаман!***

Менга кўриш учун кўз, фикрлаш учун ақл берилган. Энди мен ҳаётнинг буюк сирини биламан — ниҳоят тушуниб етдимки, менинг барча муаммоларим, ташвишларим, қайғуларим, кулфатларим аслида менинг имкониятларимни намоён этишим учун кенг майдон экан. Менинг кўзларим энди уларнинг ташқи кўринишига алданмайди. Энди мен ҳамма нарсанинг асл моҳиятига назар солишни ўргандим. Бинобарин, энди мени ташқи қиёфа алдай олмайди.

***Мен табиат яратган энг катта мўъжизаман!***

Менинг ҳайвонот ва наботот оламидан, шамол, ёмғир, тоғу тошлардан фарқим шундаки, мен бу оламга муҳаббат билан, маълум мақсадлар билан келганман. Бу ҳақиқат шу дамга қадар мен учун сир бўлиб келганди, энди бу сирни ҳамиша ёдда тутаман, у менинг ҳаётимга мазмун бағишлийди ва олға бошлайди.

***Мен табиат яратган энг катта мўъжизаман!***

Табиат мағлубиятни билмайди. Табиат ҳар доим ғолиб келган, мен ҳам ғолиб чиқишим керак. Ҳар бир ғалабамдан сўнг, навбатдагиси олдингисига қараганда енгилроқ қўлга киритилади. Менинг қўлим ҳамиша баланд келади, мен буюк ва бетакрор савдогар бўламан.

***Мен табиат яратган энг катта мўъжизаман!***



БОБ

## БЕШИНЧИ НОМА

*Мен бугунни худди сүнгги кунимдек яшайман!*

Мен бу қимматбаҳо кунимни нимага сарфлашим мумкин? Энгаввало мен ҳаётимнинг бирор томчиси қумга томмаслигини истайман. Мен бугуннинг бир сониясини ҳам кечаги кундан афсусланиш ҳисси билан ўтказмоқчи эмасман. Кечаги омадсизликлар, аламлар, ташвишлар мени йўлдан қайтаролмайди. Агар мен бугун қанча яхши ишлар қилишим мумкин бўлганида, нима учун мен кечаги ёмон ишлар ҳақида ўйлашим керак? Ахир қумсоат ичидағи қум тепага қараб оқмайди-ку? Қуёш Ғарбдан чиқиб Шарққа ботмайди-ку? Йўқ, мен шундоғам кеча йўл қўйган хатоларимни бугун тузата олмайман. Ахир мен бугун ҳам кечаги дард учун қайғуриб, уни даволай олмайман-ку? Ёки мен бугун кечагидан кўра ёшроқ бўла оламанми? Йўқ, кечаги кунга қайтиб бўлмайди. Мен кечаги йўл қўйган хатони бугун тузата олмайман, кечаги оғриқни бугун даволаб бўлмайди. Кечаги кун тарихга айланиб бўлди, уни қайтариб бўлмайди.

*Мен бугунни худди сүнгги кунимдек яшайман!*

Бугун мен нима қила олишим мумкин? Мен энг аввало кечаги кунни унутиб, эртанги кун ҳақида ўйламасликка ҳаракат қиласман. Мавҳум эртани ўйлаб, бугунги кунни йўққа чиқариш мумкинми? Эртанги кун келажакка тегишли, қумсоатдаги эртанги кун соатлари ҳеч қачон бугун оқиб келмайди. Ёки бугун қуёш икки марта чиқадими? Йўқ, албатта. Бугуннинг ўзида эртани ясад бўлмайди. Эртанги куннинг тилла тангасини бугун

ҳамёнингта сололмайсан. Эртага туғилиши керак бўлган чақалоқ бугун дунёга келмайди. Эртанги ўлим бугун бошинг узра қанотларини ёймайди. Мен эртани ўйлаб надомат чекишим қандай наф беради? Бугунги қувончни нега тушкунликка алмаштиришим керак? Ҳеч қачон менинг йўлимда қўндаланг бўлмайдиган саволлар билан ўзимни қийнаб нима қиласман? Йўқ, мен на кечаги, на эртанги кун ҳақида бош қотираман.

***Мен бугунни худди сўнгги кунимдек яшайман!***

Бугун! Менинг ихтиёrimда бор-йўғи шу — бугун бор. Мен бу кунни ўлимга хукм қилинган, аммо яшаш учун бироз фурсат берилган маҳкумнинг қувончи билан қарши оламан. Қўлимни кўкка чўзиб, менга берилган бебаҳо неъмат, бугунги кун учун Яратганга беҳад шукроналар қиласман. Мен фақат бугунни кўриш баҳтидан бенасиб қолганларга ачинаман, холос. Мен яшашга яна бир кун ҳадя этилгани боис, ўзимни энг баҳтиёр одам дея ҳисоблайман. Зотан, мен бугун арзийдиган иш қилдимми, йўқми, ўзим ҳам билмайман.

Яна яшашга мендан-да ҳақлироқ бўла туриб, бугун тириклар сафида бўлмаган одамлар ҳақида, нега уларнинг ўрнига мен ҳаётда борлигим ҳақида ўйлайман. Эҳтимол, улар ўз олдига қўйган ҳамма мақсадларга етиб бўлишгандир? Мен ҳали қилишим керак бўлган ишларим сабабли тирик қолгандирман? Эҳтимол бу кун ўз орзуларимга етишим учун яна бир имкониятдир! Демак, мен табиатнинг иродасини бажараётган эканманда. Эҳтимол, мен бугун ўз мақсадларимга етарман ёки унга озигина бўлса ҳам яқинлашарман.

***Мен бугунни худди сўнгги кунимдек яшайман!***

Менинг ҳаётим бор-йўғи бир дона, аммо ҳаёт шунчаки вақт ўлчови холос. Демак, мен улардан бирини сарфласам, иккинчисини ҳам йўқотаман. Мен бугунни

ўз ҳаётимдан чиқариб ташласам, ҳаёт китобимнинг сўнгти саҳифасини йиртиб олган бўламанми? О, йўқ! Мен бугуннинг ҳар соатида нимадир иш қилишим керак, зеро бугун ҳам ортга қайтмайди. Эртага бормисан-йўқми, аниқ ишонч ҳосил қилмасдан туриб, бу кунни бекорчилик, ҳозирги ишни эртага қўйиш билан ўтказиш аҳмоқлик эмасми? Мен бугунги куннинг ҳар дақиқаси, ҳар сониясини севаман, чунки улар бебаҳодир. Дунёning бор давлати эвазига битта ортиқча нафасни сотиб ололмайсан. Менинг эртанги куним йўқ экан, бугуннинг ҳар соатини мазмунли ўтказишим лозим.

### *Мен бугунни худди сўнгги кунимдек яшайман!*

Мен вақтни бекорга ўлдираётган бекорчилардан ўзимни четга тортаман. Мен ҳеч қачон секинлашмайман, сустлашишни меҳнат билан ўлдираман. Шубҳаларни ишонч билан, кўркувни қатъият билан енгаман. Мен вайсақиларнинг бемаъни гапларини эшишиб ўтирумайман, қўли иш билан банд бўлмаган одамлардан нари кетаман. Ялқовлик ва бекорчилик хукмрон бўлган жойларни четлаб ўтаман. Ялқов одам ўғрига ўхшайди. У ўз яқинларининг озиқ-овқати, кийим-кечаги, уй-жойини ўғирлади. Мен эса, ўғри эмасман. Мен ўз яқинларим, қадрдонларимни яхши кўраман. Шу боис, бугунги кунимни иш билан тўлдириб таштайман, ҳаммага, ҳатто энг оғир дамларда ҳам руҳимни туширмасдан ўз яқинларим учун ғамхўрлик қила олишимни исботтайман.

### *Мен бугунни худди сўнгги кунимдек яшайман!*

Бугун қилишим шарт бўлган ишни бугуннинг ўзида бажараман. Бугун мен ўз болаларимдан меҳримни дариг тутмайман. Ахир эртага нима бўлишини ким билади дейсиз? Бугун мен севикли аёлимнинг кўнглини олишга ҳаракат қиласман. Ахир эртага пешанамизга нималар битилганини билмаймиз-ку? Мен бугун қийин аҳволда

қолган дўстимга ёрдам қўлини чўзаман. Ахир уни эртага кўраманми-йўқми, Худо билади. Агар бошимга бирор иш тушса, садоқатли дўстимдан бошқа ким менга ёрдам бера олади? Агар у менинг ёрдамимга муҳтож бўлса, уни рад этишга ҳаққим йўқ. Мен бугун зўр бериб ишлашим, ўзгалар учун ўзимни қурбон қилишим керак, зотан, эрта мен учун мавхумот демакдир.

*Мен бугунни худди сўнгги кунимдек яшайман!*

Башарти бугун охирги куним экан, бугунги ишларим билан ўзимга ёдгорлик қўйишим лозим. Мен бугунни ҳаётимдаги энг гўзал кунга айлантираман. Бугун менга ҳадя қилган ҳаёт жомининг сўнгги томчисига қадар сипқораман. Бугундаги ҳар бир қимматли соат, ҳар бир дақиқа ана шундай бебаҳо ишлар билан тўлдирилади. Ўзимни аямасдан кеча ва ўтган кунгидан кўра кўпроқ ишлайман. Менинг қисматимга тижорат битилган. Мен бир дақиқа ҳам бекор ўтиrolмайман. Кўпроқ эшикни тақиллатиб, кўпроқ маҳсулот сотиб, ҳар кунгидан кўра кўпроқ даромад қиласман ва бугуннинг ҳар сонияси мен учун фойда олиб келади. Энг сўнгги куним менинг энг яхши куним бўлиши керак.

*Мен бугунни худди сўнгги кунимдек яшайман!*

Агар эртага яна бир тонгни қарши олсан, бунинг учун Яратганга беадад шукроналар ўқийман.



## ОЛТИНЧИ НОМА

*Бугун мен ўзимни бошқаришини ўрганаман ва ўз ҳисларимнинг хожасига айланаман!*

Қирғоққа ёпирилган тўлқинлар албатта ортига қайтади. Қиши ўтиб ёз келади. Кейин яна қиши бошланади, қаҳратон забтига олади. Ҳар куни қуёш чиқади, яна ботади. Учиб келган қушлар яна ўз ўлкаларига қайтиб кетади. Очилган ғунчалар кун келиб ҳазонга айланади. Ерга ташланган дон майса бўлиб униб чиқади. Бутун табиат — ҳолатлар алмасиб турадиган тор доирага ўхшайди. Мен ҳам табиатнинг бир қисми эканман, менинг ҳам кайфиятим турланиши табиий ҳол. У ҳам тўлқин сингари гоҳ кўтарилиб, гоҳ пасайиб туради.

*Бугун мен ўз ҳисларимнинг хожасига айланаман!*

Табиатнинг энг тушунарсиз жумбоқларидан бири шундаки, мен негадир бир кайфиятда ухлаб, бутунлай бошқача кайфиятда уйғонаман. Нега? Нима учун кечаги қувончдан асар ҳам қолмади? Нега кечаги кўтаринкилик бугун тушқунликка йўл бўшатди? Лекин бу жараён тескари рўй бериши ҳам мумкин. Бугунги қайғу ўрнини эртага қувонч эгаллайди. Нега бундай бўлади? Чунки мендаги ҳиссиётлар ғилдираги мунтазам айланниб туради. Қайғу қувонч билан алмашинади, севинч тушқунликка йўл беради. Менинг ҳисларим гулларга ўхшайди. Бугун қувончдан барқ уриб очилса, эртага ғамдан сўлиб қолади. Ва мен худди пайтда бугун сўлиб қолган гулларнинг

бағридаги эртанги қувонч уруғлари борлигини сезиб турман.

### *Бугун мен ўз ҳисларимнинг хожасига айланаман!*

Лекин мен ўз ҳисларим устидан қандай ҳукмронлик қиласман? Куним янада сермаҳсул бўлиши учун уларни қандай бошқаришим керак? Агар мен бир муаммони еча олмасам, кайфиятим тушиб кетади ва куним омадсиз якун топади. Даражатларнинг ва майсаларнинг ўсиши обҳавога боғлиқ. Улар қуёш қиздириши билан гуллайди, совуқ ел эсиши билан хазон бўлишади. Мен ўзим учун зарур иқлимини ўзим яратаман. Агар мен тунда ўз устимдан ёмғир ёғдирсан, демак ўзимни тушкунликка, қайғуга солган бўламан, бу менинг савдомга ҳам таъсирини кўрсатади. Агар мен ўз харидорларимни хуш кайфиятда қарши олсан, мендаги илиқлик уларга ҳам кўчиб ўтади. Менинг иқлиминим, кайфиятим ўз навбатида менинг ҳосилимга савдо-сотигимга, олтинга айланган молларимга таъсир қиласми.

### *Бугун мен ўз ҳисларимнинг хожасига айланаман!*

Ҳар бир куним баҳтли, ҳар бири ишим унумли бўлиши учун ҳисларимни қандай бошқаришим лозим? Бунинг учун мен асрий сирларнинг тагига етишим керак: кимки ўз ишини ҳисларига бўйсунган ҳолда юритар экан, у ожиздир. Кимки ишларини ақлига таяниб юритар экан, у кучлидир. Ҳар куни ўрнимдан турар эканман, тушкунликка тушмаслигим, ўз тақдиримдан нолимаслигим, шу тариқа ўзим учун навбатдаги нохушликни ҳозирламаслигим учун куйидаги режаларимни амалга ошираман.

- Агар ўзимни ғамгин сезсан, қўшиқ айтаман.

- Агар юрагимни ғам босса, кула бошлайман.
- Ўзимни лоҳас ҳис этсам, икки карра ғайрат билан ишлайман.
- Қўрқувни ҳис этсам, олдинга интиlamан.
- Ўзимга нисбатан ишончсизликни ҳис этсам, баланд овозда гапира бошлайман.
- Ўзимни қашшоқ ҳис этсам, олдинда мени кутаётган бойлик ҳақида ўйлайман.
- Ўзимни нодондек ҳис этсам, ўтмишдаги ютуқларимни ёдга оламан.
- Ўзимни ҳеч кимга кераксиз ҳис қилсан, ўз мақсадларимни эслайман.

*Бугун мен ўз ҳисларимнинг хоёжасига айланаман!*

Ҳозирдан бошлаб, шунга қатъий ишонаманки, ҳатто ташқи кўринишини ҳам ўзгартиришга қодир ички кучга эга бўлган одамларгина ғолиб бўладилар. Ҳали узоқ вақт ботинимни емиришга чоғланган ғам-андух лашкари билан курашишимга тўғри келади. Уларни илғаш осон. Аммо шундай ҳислар бўладики, улар ширин табассум остида яширинган бўлишади. Улар сизга ёрдам қўлини чўзгандек бўлиб, омадсизлик ботқоғи томона тортадиган “дўст”ларга ўхшайди. Аммо менда бундай кучларга қарши зидди заҳар мавжуд.

- Агар ўзимнинг ҳаддан ташқари ҳаволаниб кетганимни сезсам, ўтмишдаги омадсиз дамларимни эслайман.
- Ҳою ҳашамга чўма бошласам, фақирларни эсга оламан.
- Агар ором ва сокинликни истаб қолсан, рақобатчиларимни эсга оламан.
- Агар вақтингчалик омад қўзимни қамаштиrsa, толесиз дамларимни эслайман.

- Ўзимни жуда құдратли ҳис этсам, шамолни түхтатишига уринаман.
- Ўзимни ҳаммадан бой деб ўйласам, қанча очнахор одамларни түйғазишим кераклиги эсимга тушади.
- Агар ғуур мени маҳв этса, ўзимнинг ожиз ва чорасиз дамларимни эслайман.
- Агар ҳолатимни ўта ёрқин тасаввур қилсам, юлдузларга боқаман.

*Бугун мен ўз ҳисларимнинг хожасига айланаман!*


Мен бу билимларни эгаллаб бўлгач, ҳузуримга келган ҳар қандай одамнинг кайфиятини белгилай оламан. Мен уларнинг ғазабини тўғри тушунаман, чунки улар мен билган сирдан бехабар. Менинг ёнимга келган кимса ўз ҳисларини бошқара олмайди, мен эса уларни назорат қила оламан. Мен зулм ва ҳақорат ўқларини бемалол қайтара оламан, чунки бугун ёнимга келган одамнинг менга муносабати эртага бошқача бўлишига ишонаман. Мен ҳеч бир кимсанинг устидан бир кўришда ҳукм чиқармайман. Бугун ҳузуримга келиб, мендан бирор нохуш гап эшиitmagan кимса эртага мен билан мулойим қиёфада юзлашади. Агар у бугун мендан катта аравани ярим тангага олмаган бўлса, эртага битта кўчатни бир ҳамён тиллага сотиб олиши мумкин. Кайфиятни билиш, кайфиятни бошқариш бойликнинг калитидир.

*Бугун мен ўз ҳисларимнинг хожасига айланаман!*

Ҳозирдан бошлаб, мен кайфиятни англай оламан, мен бунинг сиридан огоҳман. Мен наинки ўзимнинг, балки ҳамма инсонларнинг кайфиятини аниқлай оламан. Ва шу ондан мен ўзимнинг ички “мен”имни эзгулик томон йўналтираман, кайфиятни бошқара билиш бу тақдирни

бошқариш билан баробар. Бугундан бошлаб, мен ўз тақдирим жиловини қўлимга оламан ва дунёдаги энг буюк савдогарга айланаман!

*Бугун мен ўз ҳисларимнинг хожасига айланаман ва комилликка эришаман!*





## ЕТТИНЧИ НОМА

### *Мен баралла куламан!*

Инсондан бошқа ҳеч бир тирик жонзот кула олмайды. Дараахтни жароҳатлашса йиглаши мумкин, йиртқичлар очликдан наъра тортишади, фақат мен истаган пайтимда кула оламан. Ҳозирдан бошлаб, мен ҳар доим кулиб юраман.

Мен куламан ва янада қучлироқ, соғломроқ бўламан. Мен қуламан ва менинг ташвишларим енгиллашади. Мен куламан ва саломатлигим янада яхшиланади. Мен куламан ва умрим узоқ бўлади. Кулги узоқ умр қалитидир ва бу қалит энди менинг қўлимда.

### *Мен баралла куламан!*

Ҳаммадан кўра кўпроқ ўз устимдан куламан. Зеро, дунёда ўзига жиддий қараб турган одамдан ҳам кулилироқ мавжудот йўқ. Мен ақлим қўйган қопқонга ҳеч қачон тушмайман. Гарчи мен табиатнинг энг мукаммал мўъжизаси бўлсам-да, вақт шамоли мени худди майса мисол тебратада олади. Мен қаердан келганимни ва қаерга боришимни биламанми? Менинг бугунги ташвишларим ўн йилдан сўнг менга қулгили туюлмайдими? Бугунги куннинг бемаънилиги ва баҳтсизлиги ғам чекиб ўтиришимга арзийдими? Қуёш чиқишидан олдин нима юз беришини ким менга айта олади? Менинг майда муаммоларим вақт уммони олдида нима деган гап?

## *Мен баралла куламан!*

Лекин мен қаршимда мени ўзидан нари қилишга уринаётган одамни кўрсам, қандай кулишим мумкин? Бугундан агар мени яхши кайфият тарк этаётганини сезсам, хаёлан уч сеҳрли сўзни такрорлай бошлайман. Бу сўзлар менгача асрлар ва насллар ошиб келган. Энди бу сўзлар мени олдинга бошлайди ва мукаммалликка эриштиради. Мана ўша сўзлар: Ҳамма нарса — ўткинчи!

## *Мен баралла куламан!*

Ҳамма нарса — ўткинчи. Агар касалланиб қолсам, касаллик ҳам ўткинчи эканини айтиб, ўзимга тасалли бераман. Ишим юришиб кетса, омад ҳам ўткинчи эканини ўзимга эслатаман. Бойлик мени ҳаволатмайди, чунки биламанки, бойлик ҳам ўткинчи. Баланд эхромларни кимлар қурган? Қани улар? Балки шу улкан харсанглар остида ётишгандир? Эхромларнинг ўзи-чи? Улар ҳам қачондир бир уюм қумга айланар балки? Агар булар ҳам ўткинчи бўлса, бугунги куннинг муаммолари у қадар кўрқинчли эмас экан-да?

## *Мен баралла куламан!*

Мен бу кунни оқ-қора рангларга эмас, ўз кулгим билан ўзим истаган рангга бўяшим мумкин. Мен қатъият билан ишлайман, Йўқ, баҳтли бўлиш учун эмас, балки ўзимдан ғам-қайгуни ҳайдаш учун. Бугунги қувончдан мен бугуннинг ўзида фойдаланман. Қувонч шароб эмас, уни кўзага солиб асрраб қўйиб бўлмайди. У нон ҳам эмас, омборда сақлаб қўя олмайсан. Қувонч шундай нарсаки, уни топган онингдаёқ ишлатишинг керак. Шу боис, бугундан бошлаб, мен қувонч меваси қўлимга тушиши билан тановул қиласман.

## *Мен баралла қуламан!*

Кулги менга ҳамма нарсани ўз ўлчамида кўришимга имкон беради. Каттани катта, кичикни кичик кўра оламан. Мен ўз омадсизлигим устидан қуламан ва улар худди тонги тумандек тарқалиб кетади. Мен ўз ютуқларим устидан қуламан ва улар ўзининг ҳақиқий ўлчамида кўрина бошлади. Мен зулмнинг устидан қуламан ва у менга яқинлашмасдан гумдон бўлади. Мен эзгуликнинг устидан қуламан ва у ўз ўлчами даражасидан катталашиб, мени қамраб олади. Қачонки менинг табассумим ўзгаларнинг ҳам юзида акс этса, шу кун менинг энг буюк куним бўлади. Мен табассум қилишдан тўхтамайман, ўз табассумимни ҳеч кимдан яширмайман. Зоро, ғам ҳамённи бўшатади. Шодлик эса уни олtinga тўлдиради.

## *Мен баралла қуламан!*

Энди мен бир томчи кўз ёшимни ҳам тўкмайман. Ғам, андух, афсусланиш савдогарга ярашмайди. У факат ўз қувончи ва табассумини олtinga алмашиши мумкин, кўз ёшларини эмас. Унинг ҳар бир яхши сўзи омад қасри қурилиши учун битта гишт саналади. Мен ҳеч қачон ўз бойлигим, буюклигим, билимим ва куч-кудратим билан ғуурурланмайман. Акс ҳолда ўзим ва бу олам устидан кула олиш қобилиятимни йўқотиб қўяман. Мен ҳар доим жилмайганча, пастдан юқорига боқаётган болакайга ўхшашга интиламан. Мен қуйидан юқорига боқарканман, кибру ҳаводан анча олисда бўламан.


## *Мен баралла қуламан!*

Мен қулар эканман, ҳеч қачон камбағаллашиб қолмайман. Кулги — табиатнинг буюк инъоми ва мен уни йўқотмасликка ҳаракат қиласман. Кулги ва баҳт бир-

бирига ҳамсоя. Улар бир-бирини етаклаб юради. Кулги менга баҳт ва омад олиб келади. У менга ўз меҳнатимдан ҳузурланишга ёрдам беради. Агар мен кулишдан тўхтасам, баҳт ҳам мени тарқ этади, мен эса омадсиз бўлиб қоламан. Баҳт овқатнинг таъмини безайдиган шароб. Омаддан лаззатланиш учун мен баҳтли бўлишим керак, баҳтни эса менга йўлдошим бўлмиш кулги бошлаб келади.

Мен баҳтли бўламан. Шунда омад мени кутиб олади ва мен дунёдаги энг буюк савдогарга айланаман.





БОБ

## САККИЗИНЧИ НОМА

*Бугун мен ўз қадримни юз баравар ошираман!*

Инсон даҳоси тут дараҳтидан ипак ярат олади. Инсон даҳоси лойдан мустаҳкам қалъа бино қила олади. Инсон даҳоси туфайли оддий сарв ёғочидан муҳташам ибодатхона тикланади. Инсон даҳоси қўй жунидан шоҳона либослар яратишга қодир. Модомики, лой ёки япроқ, жун ёки ёғоч шунчалик қадр топар экан, мен шуларчалик бўлолмайманми?

*Бугун мен ўз қадримни юз баравар ошираман!*

Мен ўзимни уч хил қисматидан бирини кутаётган буғдой донига ўхшатаман. Биринчисида, донни омборда сақлаб, кейин чўчқаларга ем қилишади. Иккинчисида, уни янчиб ун, кейин нон қилишади. Учинчи ҳолатда уни ерга қадаб, ундан олтин бошоқ ўстиришади. Бу бошоқ эса, яна юзлаб донни дунёга келтиради. Мен худди буғдой донига ўхшайман, аммо ундан битта жиҳатим билан фарқланаман. Дон ўз қисматини ўзи танлай олмайди. Унинг ўрнига хўжайини қарор чиқаради: истаса, уни чўчқаларга ем қиласи, истаса тегирмонда тортиб, нон ёпади ёки ундан буғдой ундиради. Менинг танлаш ҳуқуқим бор ва мен чўчқаларнинг оёғи остига ташлашларини истамайман. Мени исталган ерга сочишларини ҳам истамайман. Чунки ер ҳам ё тошлоқ, ё тақир, ё ҳосилдор бўлади. Йўқ, мен ўз қисматимни бошқаларга ишониб топширмайман.

## *Бугун мен ўз қадримни юз баравар ошираман!*

Үсиши ва ҳосил бериши учун донни қоронғилик кўйнига, ер бағрига ташлашади. Менинг омадсизлигим, мен учратган тўсиқлар, қаршиликлар ёриб чиқишим лозим бўлган зулматни эслатади. Худди буғдой дони ёмғирга, қуёшга, иссиқлик ва шамолга эҳтиёж сезгани сингари менинг вужудим ва тафаккурим ҳам парваришга муҳтож. Усиз мен ўз мақсадларимга етолмайман. Буғдой донининг ўсиши ташқи омилларга, шарт-шароитга боғлиқ. Мен эса, кимдир бундай шароит яратиб беришини кутиб туролмайман. Мен ўз тақдиримни ўзгартира оламан.

## *Бугун мен ўз қадримни юз баравар ошираман!*

Лекин буни қандай уddалайман? Авваламбор, мен ҳар куни ўз олдимга кичик-кичик мақсадлар қўяман ва уларни амалга ошираман. Аввалига кунлик режаларни ишлаб чиқаман, кейин ҳафталик, ойлик, йиллик, бир умрлик мақсадларни тузиб чиқаман. Буғдой дони ериб чиққач, уни ёмғир суғориши лозим. Мен ҳам ўз олдимга мақсадлар қўйишим, менинг барча имкониятларим юзага чиқмасидан аввал уларни амалга оширишим керак. Мақсадлар аниқ бўлгач, мен ўзимнинг ҳозирги қобилиятимни оқилона баҳолайман ва уни мавжуд тажрибаларимга таяниб юз марталаб яхшилайман. Ҳозирдан бошлаб, бу қоида менинг келгусидаги ҳаёт тарзим учун андаза вазифасини ўтайди. Мен ҳеч қачон олдиндаги мақсадимга ета олишимга шубҳа қилмайман. Ханжаримни бургутни мўлжаллаб туриб, тошга урганимдан кўра, ойни нишонга олиб, бургутга санчганим яхшироқ эмасми?

*Бугун мен ўз қадримни юз баравар ошираман!*

Режаларимнинг катталиги мени қўрқитмайди ва ортга чекинишинга мажбур қилмайди. Ҳатто ўз мақсадим сари кетаётиб, беихтиёр қоқилиб кетсам ёки йиқилиб тушсам-да, аҳдимдан қайтмайман. Фақат чувалчангларгина йиқилиб тушишмайди, чунки уларнинг иши судралишдан иборат. Йиқилишлар мени чўчитмайди, мен ўрнимдан туриб, уч карра қувват билан ўз орзум сари интилавераман. Мен чувалчанг ҳам, ҳаёти обҳаво билан боғлиқ бўлган пиёз ҳам, қўй ҳам эмасман. Мен — инсонман. Майли, бошқалар лойдан омонатгина бошпана тиклаб олаверишсин, мен қасрда яшашни истайман ва менинг мақсадим бу қаср учун тошларни излаб топишидир.

*Бугун мен ўз қадримни юз баравар ошираман!*

Кўхна ҳикматлар акс этган бу номалар ҳаётимни худди ерни қиздириб, буғдой донига ҳаёт бахш этувчи қуёшга ўхшайди. Номалардаги ҳикматлар барча орзуларимни ҳақиқатга айлантиришимга ёрдам беради. Бугунги битта ишим кечаги ўнлаб ишларимнинг ўрнини босади. Бугун нима бўлишидан қатъи назар орзуларимнинг чўққисига тирмашавераман. Агар бугун чўққини забт этолмасам, эртага чўққига албатта чиқа оламан. Кейинги чўққи эртангидан ҳам баландроқ бўлиши мумкин ва уни ҳам албатта забт этаман. Бугундан бошлаб мен учун бошқалардан ўзиб кетиш муҳим эмас. Ҳар куни ўзимдан ўзишга интилиб яшайман.

*Бугун мен ўз қадримни юз баравар ошираман!*

Мен ўз мақсадларим ҳақида гапирганимда, буғдой донининг пишиб етиладиган ўша оқшом менинг овозимни ҳаммага етказади. Бироқ, мен ўз мақсадларимни ошкор қиласканман, мен уларга қоқилиб кетмайман, акс ҳолда

ўз қиёфамни йўқотаман. Мен буюк инсонга айланаман ва менинг кулгим орқали одамлар менинг сўзларимни, режаларимни, орзуларимни эшитишади, шунда менга ўйлаганларимни амалга оширишдан бошқа йўл қолмайди. Фақат ана шундагина ўз орзуларимни амалга ошира оламан.

*Бугун мен ўз қадримни юз баравар ошираман!*


Агар менинг орзуларим у қадар юксак бўлмаса, бу ҳали фалокат эмас. Мен қатъият билан ишласам, омадсизликлар мени тарк этади. Аммо ҳеч қачон ўзим эришган ютуқларга қаноат қилмайман, чунки бундан ҳам кўпроғига қодир эканимни биламан. Кичикроқ мақсадимга эришсан, олдимга каттароқ мақсадларни кўяман. Мен шундай ҳаракат қиласманки, олдиндаги ҳар соат ҳозиргисидан кўра кўпроқ фойда келтиради.

*Бугун мен ўз қадримни юз баравар ошираман!*

Аммо, ҳеч қачон ўзим қила олишим мумкин бўлган, аммо улгурмаган ишларим ҳақида бир оғиз ҳам гапирмайман. Дунёнинг ўзи менинг меҳнатим ва қобилиятимни кўриши ва тан олиши керак. Агар кимдир мени мақтай бошласа ёки ўрнак қилиб кўрсатса, демак Яратганинг ўзи менга шуни раво кўрибди деб ҳисоблайман ва камтаринлик илиа қабул қилишга уринаман.

*Бугун мен ўз қадримни юз баравар ошираман!*

Биргина буғдои донидан шу қадар кўп дон пайдо қилиш мумкинки, бу билан ҳатто дунёдаги барча омборларни тўлдирса бўлади. Менинг ўша дондан қаерим кам? Мен ундан-да кўпроғига қодирман.



## ТҮҚҚИЗИНЧИ НОМА

Менинг орзуларим лойдан, режаларим чангдан иборат, мақсадларимга эса етиш амри маҳол. Ҳеч нарса амалда тасдигини топмас экан, ҳеч қандай қиймат касб этмайди.

*Мен бугундан ҳаракатга киришишаман!*

Дунёда рангли ва мукаммал хариталар жуда кўп, аммо уларнинг ҳеч бири инсонни ўз ўрнидан бир қарич ҳам силжита олмайди. Жуда кўп қонунлар мавжуд, аммо улар қанчалик адолатли бўлмасин, ҳеч бири бирор-бир жиноятнинг олдини ололмайди. Дунёда ҳеч бир матн йўқки, ҳар қанча дохиёна бўлишидан қатъи назар ўзича бир чақа пул ишлаб, тингловчиларни ҳайратга солсин.

*Мен бугундан ҳаракатга киришишаман!*

Амалиёт! Агар инсон томонидан ҳаракатга келтирилмас экан, хариталар ҳеч кимга наф бермасдан, чанг босиб ётаверади. Инсоннинг ҳаракатисиз ҳеч бир қонун самара бермайди. Бирор-бир ҳикмат то ундан фойдаланилмас экан, бир чақага қиммат бўлиб қолаверади. Бу номалар ҳам худди шундай. Инсонни у эмас, балки ҳаракат, амалиёт бойитади. Ҳаракат, иш менинг режаларимни мақсад ва орзуларимни ҳақиқатга айлантиради. Амалиёт — бу мен интилаётган омаднинг суви ва нонидир.

*Мен бугундан ҳаракатга киришишаман!*

Менинг оёғимдан тортадиган нарса бу қатъиятсизлигим, сусткашлыгимдир. Улар күркүвдан туғилади. Бироқ энди мен асрлар оша мардонавор етиб келган сирдан хабардорман. Энди мен күркүвни фақат иш билан енгиш мумкинлигини биламан. Мен суръатни асло туширмасдан ишлайвераман ва күркүвни енгаман. Ҳаракат билан чегараларни маҳв этиш ва ўзни күркүвдан халос этиш мумкин. Мен ҳаракатим билан күркүв шерини мулоим құмурсқага айлантираман.

***Мен бугундан ҳаракатга киришишаман!***

Энди мен ҳамиша фақат учаётіб, нур таратадиган тиллақүнғиздан ибрат олиб яшайман. Мен тиллақүнғизга айланаман ва кундузлари ҳам қүёш нуридан күра ёрқинроқ күринишга уринаман. Майли бошқалар капа-лақдек турфа гуллар узра қанот қоқаверишсін. Мен эса тиллақүнғиз бўламан ва бутун дунё менинг нуримни кўра олади.

***Мен бугундан ҳаракатга киришишаман!***

Мен бугунги ишни ҳеч қачон эртага қолдирмайман. Зотан, менда эртанинг ўзи борми-йўқми билмайман. Менга бошлаётган ишим баҳт ёки омад келтиришидан қатъи назар бугундан ҳаракатни бошлайман. Мен шунчаки ишлашни бошлайман, токи мени ҳеч ким уқувсиз, ишёқмас дея олмасин. Баҳтга эса меҳнат туфайли эришилади. Баҳт парваришиз, ҳаракатсиз нобуд бўладиган ниҳолга ўхшайди.

***Мен бугундан ҳаракатга киришишаман!***

Ҳаракат қиласман, ҳозироқ, ҳозироқ, ҳозироқ! Ҳаракат қиласман!

Ҳозирданоқ мен бу сўзларни бетўхтов қайтаравераман. Мен бу сўзларни ҳар куни, ҳар соат то тану жоним-

га сингиб кетгунига қадар қайтаравераман. Улар худди нафас сингари ҳаётимнинг бир қисмига айланади. Ҳаракат, меҳнат менинг эҳтиёжим бўлиши лозим. Худди киприклар ҳамиша пирпираб тургани сингари мен ҳам ишламасдан туролмайман. Мен ҳамиша ўзимни меҳнатга жалб этарканман, ўзимни ҳар қандай тўсиққа тайёрлаб бораман ва у мени қўрқитолмайди. Ўз меҳнатим билан мен жаҳондаги ҳамма тўсиқларга қарши чиқаман. Мен уларни енга оламан, чунки мен баҳтсиз одамнинг ролини ўйнамаяпман.

### *Мен бугундан ҳаракатга киришишаман!*

Бу сўзни қайта-қайта такрорлайман. Эрталаб мен тўшагимдан туарканман, бу сўзларни айтаман. Майли омадсизлар ухлайверишин, мен эса ишлашим керак.

### *Мен бугундан ҳаракатга киришишаман!*

Мен дўконимга киришим билан дарҳол ишимни бошлайман, ўз маҳсулотимни таклиф этишга киришишаман. Мен маҳсулотимни рад этишларидан қўрқмайман, чунки мен бари бир ишимни давом эттираман.

Гарчи мени омадсизлик кутаётганини аниқ билиб турсам ҳам ёпиқ эшиклар олдида тўхтаб, қўрқмасдан уни тақиллатаман.

### *Мен бугундан ҳаракатга киришишаман!*

Агар қаердадир чалғиб қолсам, дарров сергак тортаман. Агар нимагадир чалғиб, йўлимдан адашгудек бўлсам, ҳамма орзуларим қулаб тушади.

### *Мен бугундан ҳаракатга киришишаман!*

Агар мен чарчаб қолсам, бугунги ишимни эртага давом эттиromoқчи бўлсам, мен ўзимни мажбурлаб

бўлса-да, давом эттиришга ундейман. Шу заҳоти бугун бирор ишни битирмагунча ишдан тўхтамасликка ҳаракат қиласман.

*Мен бугундан ҳаракатга киришишаман!*

Менинг қийматим қилган ишларим билан белгиланади. Ишларим кўпайса, қадрим ҳам ошади. Мен ўз ишимни кенгайтириб, омадсизлик яқин йўламайдиган кўчаларни излайман. Мен тинимсиз меҳнат қиласман, шунда омадсизлик ҳам ортимдан кувишдан чарчайди. Агар омадсизлик мени бир жойда тўхтатмоқчи бўлса, мен у бориши мумкин бўлмаган ўнлаб бошқа жойларга ошиқаман. Мен ҳали омадсизлик қулоғимга шивирлаб, кечикканимни англатмасдан туриб ишимни битираман.

*Мен бугундан ҳаракатга киришишаман!*

Чунки бугун бу — ҳамма нарса, эртани эса ялқовларга қолдираман. Мен ялқов эмасман. Эртага зулм ҳам мурувватга айланар, лекин мен зулм эмасман. Эртага заифлар кучлироқ бўлишар, мен эса заиф эмасман. Эртага омадсизнинг ҳам омади чопар, лекин мен бугун улгуринб қолишим керак, чунки мен омадсиз эмасман.

*Мен бугундан ҳаракатга киришишаман!*

Агар шер оч қолса, овқатланади, бургутни чанқоқ қийнаса сувга учуб боради. Ҳайвонлар яшаш учун ҳаракатланишади. Мени ҳам очлик ва ташналик қийнамоқда. Мен омад, баҳт ва хотиржамликка ташнаман. Мен фақат иш билан ўзимни факирликдан, ночорлик кўз-ёшларидан, уйқусиз машъум тунлардан қутқараман.

Мен ўзимни бошқариш ва ўз буйруқларимни бажаришга ўргандим.

*Мен бугундан ҳаракатга киришишаман!*



БОБ

## ЎНИНЧИ НОМА

Орамизда кулфат ё бахтсизликка йўлиқиб қолса, Яратгандан мадад сўрамайдиган бирор кимса бормикин? Фам, бахтсизлик, ўлим, бизнинг қўлимииздан келмайдиган мушкулотлар, биз ҳал қилолмайдиган муаммолар билан юзма-юз келганда, ким Парвардигорга юзланмайди? Дуолар, муножот қаердан ва қачон пайдо бўлганини ҳеч ким билмайдиган қадимий ва чукур инстинктлар саналади. Бошига мусибат тушганида, гамташвишга дуч келганида Яратганга нола қилмаган бирор одам бормикин?

Агар кимнингдир юзига қараб қўлингни силкитсанг, у сесканиб, киприк қоқади. Агар тиззангга чертсанг, оёғинг тепага сапчиди. Кимгadir қўрқинчли гап айтиб қолсанг, у беихтиёр “Эй Худо！”, дея хитоб қилади. Нега? Ўша қадимий инстинкт унга нутқ ва ҳиссиёт ато этади. Ҳатто, эътиқоди заиф одам ҳам оғир дамларда Яратганни эсга олишини тан олади ва бу ҳаётимиздаги сирлардан биридир. Ҳар биртирик жон, жумладан инсон ҳам мусибат онida ёрдам сўрайди. Бу — инстинкт. Аммо бу хислат бизга нима учун берилган? Бизнинг бу ғайрихтиёрий нидомиз ўзига хос дуо эмасмикин? Наҳотки, табиат бу инстинктни паррандаю даррандаларга, инсонларга бериб, уларнинг нидоси Парвардигорга етиб боришини таъмин этмаган бўлса? Акс ҳолда табиат бу инстинктни бизга бериб нима қиларди? Мен ҳам энди дуо киламан, аммо Ундан фақат тўғри йўл кўрсатишни сўрайман,

холос. Мен Қодир эгамдан мол-дунё сўрамайман. Мен ўз қулимга у ёки бу нарсани бажаришни сўрайдиган хожа ҳам эмасман. Мен Яратгандан олтин ёки кимнингдир муҳаббатини қозонишни, катта ғалабалар ёки майда ютуқлар, соғлиқ ва баҳт ҳам сўраб ўтирумайман. Мен Ундан биргина нарсани сўрайман: Мен ўзим истаган мақсадларга эришишим учун тўғри йўл кўрсатишини сўрайман, холос. Парвардигор бу ўтинчимни бажо этишига ишонаман. Мен Худодан тўғри йўл сўрайман ва у истаса қабул қиласди, истамаса йўқ. Иккинчи ҳолат ҳам менинг саволимга етарлича жавоб бўла олади. Агар бола отасидан нон сўраса-ю, уни ололмаса, бу ҳам қандайдир жавоб-ку, тўғрими?

Мен ўзимга маслаҳат, тўғри йўл сўраб дуо қиламан. Менинг дуоларим қўйидагича бўлади:

Эй бутун борлиқни Яратган эгам, бу оламга фақир ва ёлгиз бўлиб келган мендек бандангдан карамингни дариг тутма! Дунёда мени қўллаши мумкин бўлган энг қудратли қўлнинг соҳиби Сенсан. Агар Сен мадад бермасанг, тақдир сўқмоқларида адашиб, баҳт ва омад йўлини ҳеч қачон топа олмайман.

Сендан олтин ва қимматли либослар сўрамайман, ўз қобилиятимни намоён этиши учун имконият ҳам сўрамайман. Фақат бир нарсани сўрайман — мени шундай йўлга бошлагинки, ўз қобилиятим билан етишим мумкин бўлган ҳамма нарсага мусассар бўлай.

Ўз ризқини топиб ейши учун шер ва бургутга ўткир панжсалар ва тирноқлар ато этдинг. Менга ҳам шундай куч, гайрат ва ақл ато этгилки, улар ёрдамида одамлар орасида шерга, ўз ишимда эса бургутга айланай.

*Ҳамиша камтарин ва камсүкүм бўлиб қолишишмга ўзинг кўмак бер, ҳаддан ортиқ кибрланиб кетмаслигим учун қаршиимда тўсиқлар тиклагин, аммо мени галаба билан бирга келадиган қувончлардан мосуво қилма.*

*Ҳеч қачон бирорларнинг таъсири остига тушиб қолишишмга йўл берма, мени шундай бошқаргинки, мен бошқалар ҳеч нарса топа олмаган ердан омад уруғларини топа олай. Руҳимни синовдан ўтказа оладиган қўрқув юбор, шу билан бирга уни енга оладиган қувват ҳам ато этгилки, мен ўз омадсизликларим устидан кула олай.*

*Менга кўзлаган барча мақсадларим ижобатини кўришига етгулик умр бер, шунингдек, бугунги кунимни худди ҳаётимнинг сўнгги кунидек яшашим учун ўз ёрдамингни аяма.*

*Нутқимга, ўзимга илҳом бахши этгинки, унинг ёрдамида муваффақиятга эришиай, аммо уни гийбат ва фаҳш сўзларга банд бўлишидан асра.*

*Менга куч-қувват ва қатъият багишила. Нигоҳимни ўткир қилгилки, ўз имкониятларимни кўра олай. Шунингдек, ўз кучимни тўғри ўйналтиришим учун сабр ва қобилият ато қил.*

*Мени ёмон одатлардан халос эт, ахлоҳимни гўзал қилгин. Мени бемор ва ожизлар билан ҳамнафас қилгил, бу оламда ҳамма нарса ўткинчи эканини тушунишим учун идрок багишила.*

*Майли, мени бошқалар кўра олмаса-да, менинг қалбимни одамларга нисбатан меҳр ва оқибат билан тўлдир. Токи, мен ўз душманларимни дўстларимга айлантира олай.*

*Агар бу истакларим Сенга мақбул бўлса, уларни ижобат айла! Мен Сен яратган борлиқ узумзоридаги кичик бир шингилман. Аммо Сенинг ироданг ила мен*

бошқалардан фарқланиб тұраман. Дарҳақиқат, мен үзим интилаётган мақомга муносибман, бу йүлда Сен үзинг менга раҳнамолик қил.

Ёрдам бер менга Раббим, үзинг йүл күрсат!

Сен зыммамга юқлаган вазифаларни тұла-тұқис ба-  
жо келтирмөгім учун күч-құвват ато эт!

Ё Раббим, мендек бенаво тоғырдан марҳаматингни  
аяма. Үзинг құлла, үзинг құвватла Раббим!





## УЗОҚ КУТИЛГАН МЕХМОН

Хафид бу номаларнинг навбатдаги эгаси келишини кутиб, ўз қасридаги ҳужраларнинг бирида ёлғиз ўтиради. Хафиднинг ёнида кекса хизматкор Эрасмусдан бўлак ҳеч ким қолмаганди. Вақт ўтиб бораради. Қиш ўз ўрнини баҳорга, баҳор ёзга, ёз эса яна қишига бўшатиб берарди. Қарилик ўз ишини қилди. Хафид энди камдан-кам ҳолларда қасридан ташқарига чиқар, асосан боғида ўтиради.

У кутарди. У ўзининг афсонавий бойлигини одамларга тарқатиб берганидан кейин ҳам уч йил кутди.

Мана кунларнинг бирида Шарқдан, саҳро тарафдан шаҳарга бир ажнабий кириб келди. Ўрта бўйли ажнабий оқсоқланганча Дамашққа кириб, ҳеч кимдан ҳеч нарса сўрамай, тўғри Хафиднинг қасрига йўл олди. Эшик олдида турган Эрасмус ажнабийга бошдан-оёқ разм солиб чиқди.

— Сенинг хожанг билан гаплашмоқчи эдим, — деди ажнабий тавозе билан бош эгиб.

Унинг кўримсиз қиёфасига киборларга хос муомаласи мос тушмай туради. Оёғидаги сандали йиртилиб кетган ва ингичка чилвир билан боғланган, оёқлари эса шилиниб, яра-чақа босиб кетганди.

У елкасига тuya жунидан тўқилган, аллақачон ямок тушган эски чакмонни ташлаб олганди. Узун соchlари офтоб нурларида оловланиб турар, юzlари жазирамада

қорайган эди. Фақат ёрқин рангли кўзлари унинг ичидаги гаройиб бир ёғдуни яққол акс эттиарди.

Эрасмус ажнабийга шубҳали термилди:

– Хожамда нима ишинг бор? – сўради у ниҳоят. Ажнабий орқалаб олган эски каноп тўрвасини ерга қўйиб, қўлларини олдинга чўзди.

– Мендан ранжима о, яхши одам, – илтижо қилди у. – Хожангга бирор ёмонлигим йўқ. Мен қароқчи ҳам, тиланчи ҳам эмасман. Менга бирорнинг бир чақаси керакмас. Мен сенинг хожанг билан кўришишим ва у эшитишни истаётган гапни етказишим керак. Агар у мени эшитишни истамаса, ўша заҳоти чиқиб кетаман.

Эрасмус иккиланиб қолди. Нотаниш кимсанинг гаплари унинг ўта олийжаноб ва меҳрибон одам эканлигидан далолат берарди. Шу боис Эрасмус уни хожасининг қошига бошлади.

– Орқамдан юр, – деди ва қасрнинг ичига қараб кетди. Нотаниш одам оқсоқланганича унга эргашди.

Боққа кирапкан Эрасмус Хафидни учратди. У мудраб ўтирарди. Эрасмус бир неча бор йўталганидан сўнг хожаси кўзини очди.

– Мени афв этгайсиз, хожам, – деди Эрасмус, – лекин бир одам сиз билан гаплашмоқчи бўлиб турибди.

Хафид бошини кўтариб, Эрасмусдан сал орқароқда турган ажнабийга қаради. Ажнабий чукур таъзим билан гап бошлади:

– Аввало айт-чи, сен дунёнинг энг буюк савдогаримисан? – дафъатан сўради ажнабий.

Хафид хиёл қовоқ уйиб, бош ирғади:

– Ҳа, мени қачонлардир шунаقا деб аташган. Аммо мен анчадан бери сен айтган буюклик шоҳсупасини тарк этганман. Мендан нима истайсан?

Меҳмон қаддини ростлаб, Хафидга қаради. Дафъатан олдинга бир қадам босди-ю, яна тўхтаб қолди. Афтидан узоқ йўл уни ҳолдан тойдирганди. Ажнабийнинг кўзлари чақнаб, жабрдийда қиёфаси унга ўзгача ифода бахш этиб турарди.

– Менинг асл исмим Савл, мен Куддусдан она шахрим Тарсга қайтаяпман. Менинг кийимимни кўриб ажабланма. Мен йўлтўсар қароқчи ёки тиланчи эмасман. Тарс ва Рим фуқаросиман. Аввал устачилик қилганман, кейин устоз Гамалаилдан сабоқ олганман. Мени баъзилар Павел ҳам дейишади.

Ажнабий гапиришга ҳам қийналар, баъзида нафаси бўғзига тиқилиб қоларди. Хафид меҳмонга етарлича эҳтиром кўрсатмагани учун ўзидан хижолат бўлди ва узр сўради:

– Мени афв эт, йўловчи, марҳамат, ўтиришинг мумкин.

Павел миннатдорчилик билан бош ирғади, аммо турган ерида қолаверди.

– Сенинг ёнингга эҳсон сўраб эмас, фақат сен менга беришинг мумкин бўлган маслаҳат ва ёрдам сўраб келдим, – давом этди у. – Аммо, ундан аввал бу ёққа келаётганимда Дамашқ йўлида юз берган воқеаларни сўзлаб беришимга изн бер.

Эрасмус, хўжайинига қараб, қандайдир ишора қилганди, хожаси унинг бу ҳаракатини сезмаганга олди. У кутилмаган меҳмонни диққат билан кўздан кечириб, ҳикоясини тинглашга рози эканини билдириб бош ирғади.

– Мен сенга бошимни кўтариб туришим учун қариллик қиласман, – деди Хафид. – Шу боис, ўтириб гапиравер, мен сени эшитаман.

Павел тўрвасини ерга қўйиб, Хафиднинг каравоти ёнидан жой олди. Хафид эса унга ҳамон қизиқсиниб қараб турарди.

– Тўрт йил илгари ёлғон ҳақиқатларни кўр-кўrona ўрганиб юрган пайтимда Куддусда авлиё Стефанни оломон қандай тошбўрон қилганини кўргандим. Синедрион уни ибрийлар тангрисига осий бўлгани сабабли ўлимга ҳукм этганди.

Хафид ажабланиб қош чимирди:

– Бунинг менга нима алоқаси бор?

Павел шарт қўлинни кўтарди.

– Тинчлан, аслида бунинг сенга алоқаси йўқ. Аммо бу ҳақда гапирмасдан туриб, ўз саргузаштимни бошлай олмасдим. Стефан Исо исмли бир устознинг издошларидан эди. Стефанинг ўлимидан бир йил аввал римликлар уни ҳам давлат жиноятчиси сифатида айблаб, чормихга тортишганди. Стефанинг бор гуноҳи Исони Масиҳ ва пайғамбар дея тан олганида эди. Зотан кўплаб пайғамбарлар унинг келишини аввалдан башорат қилишганди. Стефанинг айтишича, римликлар буюк пайғамбарни ҳеч бир гуноҳсиз қатл этишган. Бундай гапларни тилга олиш ўлим билан баравар эди ва шундай бўлди ҳам. Бу ҳодисада мен шунчаки томошабин эмас, иштирокчи ҳам эдим. Ўша пайтларда мен жуда ёш ва тақводор эдим. Мен ўша пайтда ўз эътиқодимизнинг ҳақиқий посбонларидан эдим, шу боис менга қўшинга бошчилик қилиб, Дамашққа келишни ва Исо издошларини йўқ қилиш топширилган эди.

Эрасмус Хафидга зимдан кўз ташлади. Унинг назарида хожаси ажнабийнинг ҳикоясини бефарқлик билан тингламоқда эди. Бунақа дайди йўловчилар Шарқдан кўп келарди. Ажнабий жим қолди. Боғда сирли

сукунат чўқди. Бу жимликни фақат боғдаги фавворанинг шарқираши бузиб турарди холос. Кўп ўтмай Павел яна тилга кирди:

– Хуллас, мен Исонинг тарафдорларини қатл этиш, қолганларни бу йўлдан қайтариш учун турли қийноқларга солиш иштиёқи билан Дамашққа бораётгандим, йўлда кўзим илиниб туш кўрибман. Эсимда: аввалига ноаён бир куч мени тиз чўкишга мажбур қилди. Кейин ғойибдан бир овоз эшитдим: “Павел, нега мени таъқиб этмоқдасан?”, “Кимсан?” деб сўрадим. “Мен ўша, сен таъқиб қилаётган Исотан, – деди ҳалиги овоз.– Энди ўрнингдан туриб, Дамашққа киравер, сенга нима қилишинг кераклигини ўша ерда айтишади”. Мен шу заҳоти ўрнимдан турдим. Аммо ҳеч нарсани кўролмас, худдики кўр бўлиб қолгандим. Мени қўлимдан тутиб, Дамашққа олиб киришди. Мен уч кун давомида Исонинг издошларидан бирининг уйида турдим. Шу уч кун мен туз ҳам тотмадим. Ҳатто томоғимдан сув ўтмасди. Шу пайт мени йўқлаб Анания исмли бир киши келди. Унинг ҳам тушида илоҳий амр бўлган экан. У кафтини менинг кўзларим устига кўйганди, қароқларимга яна нур эниб, дунё жо бўлди. Кейин бемалол овқатлана олдим. Аввалги кучим қайтиб келганди.

Кутилмаганда Хафид хиёл эгилиб, сўради:

– Кейин-чи, кейин нима бўлди?

– Мени ибодатхонага олиб боришди. Аммо Исонинг издошлари мени кўриб, кўркиб кетишди. Чунки улар менинг бу шаҳарга нима мақсадга отланганимдан огоҳ эдилар. Бироқ, мен улар билан кўшилиб ибодат қилдим, Исонинг пайғамбар эканига иймон келтирдим. Аммо, уларнинг аксарияти менга бари бир ишонишмади. Улар “бу кимса шунчаки бизни лақиллатаяпти, бизни таниб

олиш учун келган, эртага ҳар биримизни топиб, қатл этади”, дея хавотирда эдилар. Ҳаммани Масиҳга иймон келтирганимга ишонтиришим қийин кечди. Мени кўпчилик ўлдирмоқчи ҳам бўлди. Шундан сўнг қочиб яна Куддусга келдим. Қуддусда ҳам шу нарса такрорланди. Исонинг тарафдорларидан ҳеч бири мени тан олишни истамади. Гарчи ибодатхонада тавба қилган бўлсам-да, ҳамма мендан ўзини олиб қочарди. Қанча ибодат қилмай, Исо ҳақида ҳар қанча гапирмай, бари бефойда эди. Мени бирор эшиитмасди. Кунларнинг бирида бир ибодатхонага бориб қолдим. Ибодатхона олдидағни савдо расталарида курбонлик учун кўзичоқлар ва қушлар сотишмоқда эди. Ўша ерда яна ғойибдан овоз эшиитдим.

– Бу гал нимани эшиитдинг? – сўради Эрасмус худди хожаси сингари ажнабийнинг ҳикоясиغا қизиқиши ортиб бораётганини яширмай. Йўловчи ҳайрат ичида мулозимга қаради. Хафид эса ҳикояни давом эттириши учун ажнабийга ишора қилди.

– У менга шундай деди: “Тўрт йилдирки, сен одамларни иймонга даъват этасан. Аммо, сени ҳеч ким эшиитмаяпти. Сен ҳар бир сўзингни худди савдогар молини мақтагандек, ўтказа билишинг керак. Мен ҳам ўз мақсадимни масалларим ёрдамида англатганман. Йиртиқ тўр билан кўпроқ қуш тута олмайсан. Дамашққа қайт ва одамлар дунёдаги энг буюк савдогар деб атайдиган инсонни қидириб топ. Унга одамларга Менинг сўзларимни етказмоқчи эканингни айт. У сенга нима қилиш кераклигини айтади”.

Хафид Эрасмусга тезгина назар ташлади. Кекса хизматкор хожасининг нигоҳларидағи сўзсиз саволни илғаб олди. “Наҳотки, бу жулдор ажнабий менинг хожам

шунча йилдан бери кутаётган одам бўлса?” – деган хаёл унинг миясидан чақнаб ўтди.

Хафид қўлини Павелнинг елкасига ташлаб, сўради:

– Энди менга айт-чи, Исо деганинг ким ўзи?

Павел худди унга ғойибдан куч оқиб кираётгандек илҳом билан гапириб берди. У Хафидга Исо ва унинг қисқагина ҳаёт йўли ҳақида гапириб берди. Унинг айтишича, одамлар башорат қилган нажоткор Масих келишини узоқ ва катта орзу-умидлар билан кутишган. Ажнабий аввал Яҳё алайҳиссалом воқеаси ва унинг ортидан Исонинг зуҳур этилганини айтиб берди. Исонинг кўпгина мўъжизалари, касалларни даволагани, ҳатто ўликларни тирилтирганини ҳам ҳикоя қилди. Кейин эса, малъунлар Исони хоинларча хочга михлашганини, кейин пайғамбарнинг қайта тирилиб, фалакка, Парвардигор хузурига кўтарилганини сўйлади.

Сўзининг хотимасида ўз ҳикоясига ҳақиқат тусини бериш учун бўлса керак, оёғи остида турган тўрванинг боғичини ечиб, у ердан қизил рангли ёпинчиқни чиқарди.

– Кара, хожам, – деди Павел тўлқинланиб, матони Хафиднинг қаршисида ёзиб қўрсатаркан, – мана бу — Исонинг бор-йўқ бисоти. Бу дунёда унинг шундан бошқа бирор моли бўлмаган. Уни хочга михлашганда, риммиклар бу мато кимга тегишини аниқлаш учун қуръа ҳам ташлашган. Мен бу матони сотиб олиш учун қанча молим ва вақтимни сарфламадим.

Хафид оқариб кетганди. У титраб-қақшаб қип-қизил қон доғлари кўриниб турган ёпинчиқقا қўл узатди. Эрасмус, хожасининг юзидағи ҳаяжонни кўриб, унга яқинлашди. Хафид то матонинг бир четидагидаги Толи ва Патроснинг таниш савдо белгисини топмагунча айлантириб кўраверди.

Павел ва Эрасмус кекса савдогар бу эски матони юзига босганча унсиз йиглаётганини жим кузатиб туришарди. Хафид бу матони минглаб ёпинчиқлар орасидан ҳам бемалол ажрата оларди. Шу пайтгача унинг қўлидан бундай молларнинг қанчаси ўтди. Аммо илк ёпинчиқ воқеаси кечагидек унинг ёдида.

– Исонинг туғилиши билан боғлиқ нимани билсанг, айт, – пичирлади Хафид, ҳайратдан донг қотиб турган Павелга юzlаниб.

– У бизнинг дунёга жуда оз нарса билан келди ва ундан-да озроқ нарса билан кетди. У Байт-Лахм яқинидаги ғорда, император Тиберий ҳукмронлиги пайтида туғилганини биламан, холос.

Хафид жилмайди, унинг табассумида болаларга хос бегуборлик ва хуррамлик акс этарди. Хафиднинг ажин босган юзидан ёш томчилари думалади. Уларни бир четга сидиаркан, деди:

– Исо туғилган фурсатда осмонда ёрқин бир юлдуз пайдо бўлмаганми? Бунақа юлдузни бу оламда ҳали ҳеч ким кўрмаган...

Павелнинг ҳайратдан оғзи очилиб қолганди. У нимадир демоққа уринса-да, овози чиқмади.

Бир неча дақиқа жимлиқда ўтди. Сўнг Хафид қўлини кўтариб, Эрасмусни ёнига чорлади.

– Менинг садоқатли кекса дўстим, минорага чиқиб, ўша сандикчани олиб кел. Ниҳоят менинг ворисим кимлиги маълум бўлди...

## МУНДАРИЖА

Мұқаддима .....	3
Биринчи боб. Саховатдан саховатгача .....	10
Иккінчи боб. Сандиқчадаги сир .....	15
Учинчи боб. Хафиднинг болалиги .....	22
Тўртингчи боб. Байт-Лахмга қилинган сафар .....	32
Бешинчи боб. Эҳсон қилинган ёпинчиқ .....	37
Олтинчи боб. Сирли номалар .....	42
Еттингчи боб. Орзулар сари илк қадам .....	48
Саккизинчи боб. Биринчи нома .....	52
Тўққизинчи боб. Иккінчи нома .....	57
Ўнинчи боб. Учинчи нома .....	62
Ўн биринчи боб. Тўртингчи нома .....	66
Ўн иккинчи боб. Бешинчи нома .....	70
Ўн учинчи боб. Олтинчи нома .....	74
Ўн тўртингчи боб. Еттингчи нома .....	79
Ўн бешинчи боб. Саккизинчи нома .....	83
Ўн олтинчи боб. Тўққизинчи нома .....	87
Ўн еттингчи боб. Ўнинчи нома .....	91
Ўн саккизинчи боб. Узоқ кутилган меҳмон .....	95

УЎК:159.9(73)

КБК 88.53

М24

Мандино, Ог.

М24      Дунёнинг энг буюк савдогари/Ог Мандино; тарж.  
Р. Жабборов. – Т.: «DAVR PRESS» НМУ, 2015. – 104 б.

ISBN 978-9943-984-21-9

УЎК:159.9(73)

КБК 88.53

### *Маърифий-оммабоп нашр*

Ог МАНДИНО

## **ДУНЁНИГ ЭНГ БЮОК САВДОГАРИ**

Бош муҳаррир Асрор Мўмин

Масъул муҳаррир Хосият Ражабова

Бадиий муҳаррир Жаҳонгир Абдужалилов

Муҳаррир Лола Шаймова

Дизайнер Азиза Ойназарова

Саҳифаловчи Мовия Тўхтаева

Нашриёт лицензия рақами AI № 213

2015 йил 19 февралда нашриётта топширилди.

2015 йил 20 марта босишга рухсат этилди.

Бичими 84x108 1/32. «Times New Roman» гарнитураси.

Шартли босма табори 5,46.

Нашриёт ҳисоб табори 3,88. Адди 2000 нусха.

1039-сонли буюртма. Баҳоси шартнома асосида.

Оригинал макет «DAVR PRESS» нашриёт-матбаа  
уйида тайёрланди.

«DAVR PRESS» НМУ МЧЖнинг матбаа бўлимида  
офсет усулида чоп этилди.

Манзил: Ўзбекистон Республикаси, 100156,  
Тошкент шаҳри, Чилонзор тумани, 20-А даҳа, 42-үй.

Тел: + (99871) 120-1299;

Маркетинг бўлими: + (99871) 120-1233; 120-1202.

Web: [www.davrpress.uz](http://www.davrpress.uz)

E-mail: [davr-press@mail.ru](mailto:davr-press@mail.ru)